

**NATIONAL ASSEMBLY OF
SEYCHELLES**

Wednesday 4th November, 2020

The Assembly met at 09am

National Anthem

Moment of Reflection

Mr Speaker in the Chair

MR SPEAKER

Nou a obzerv en moman refleksyon. Mersi. Bonzour tou Manm Onorab, bonzour tou nou telespektater a lekout ki pe swiv nou e byenveni. Nou *Sitting* i komanse. Nou annan ozordi plizyer Mosyon. Me pou ou lenformasyon nou bann telespektater ki swiv nou, i konsern apwentman bann Komite Lasanble. E avek sa nou a demare, Onorab Bernard Georges i a komanse.

HON BERNARD GEORGES

Mersi Mr Speaker. Bonzour Mr Speaker, bonzour tou bann Manm Onorab dan Lasanble. E bonzour tou bann dimoun ki pe swiv nou dan lakour.

Mr Speaker mon premye Mosyon i lir *comme swivan; Pursuant to Article 104 of the Constitution, this Assembly appoints the Standing Orders*

Committee, to have the functions set out in Standing Orders 89.

Mr Speaker si sa Mosyon i ganny segonde, mon ti a kontan apre ki in ganny segonde dir detrwa mo an faver sa Mosyon. Mersi.

MR SPEAKER

Wi, segonde. Onorab Clifford Andre.

HON CLIFFORD ANDRE

Mersi Mr Speaker. Bonzour tou Manm Onorab. Bonzour tou dimoun a lekout. Mr Speaker mon ti a kontan segonn sa Mosyon.

MR SPEAKER

Mersi Onorab. Onorab Georges.

HON BERNARD GEORGES

Mersi Mr Speaker. Mr Speaker, Konstitisyon Sesel i fer provizyon pou ki i annan 2 Komite Lasanble. E sa se sa 2 Komite Konstitisyonnèl e i 2 *Standing Committee* parey nou apel zot dan sa Lasanble. I annan 2 kalite, 2 kalite Komite an prensip.

And se en Standing Committee napa nanryen pou fer avek Standing Orders Committee. Me en Standing Committee, e li set en Komite ki ganny formen. E ki stand pou

sa peryod ki sa Lasanble i an sesyon. Apre i annan sa ki nou apel bann *Select Committees*. E zot se bann Komite ki ganny apwente, ki ganny elekte, swa pou peryod an antye Lasanble, parey nou pou vwar taler. Oubyen pou desarz en fonksyon spesifik. Apre sa Komite i disparet. Sa set en *Select Committee*.

E si ou anvi fer en *Standing Committee* parey mon'n dir, i *last* pou en sesyon Lasanble an antye, en *Select Committee*, i kapab *last* pou en peryod endefini oubyen pou en rezon endefini.

Me i osi kapab *last* pou sa peryod Lasanble an antye. Dan lekel ka nou apel li en *Select Sessional Committee* oubyen en *Sessional Select Committee*. Akoz i pou *last* pou sa sesyon an antye. E nou pou annan detrwa taler ki nou pou vwar ki tonm dan sa kategori.

Konstitisyon li parey mon'n dir o komansman i prevwar 2, 2 *Standing Committees*. E sa nou bezwen fer. E Lartik 104 i *provide* pou sa. Sa Komite prensipal anba Konstitisyon set enn ki dan trwazyenm Mosyon taler Onorab *Leader* Lopoziyon pou move, e sa set *FPAC*.

Lot se *Standing Orders Committee*. E *Standing Orders*

Committee, parey sa Mosyon pe demann li fer, i pou annan bann fonksyon ki ganny *set out* dan *Standing Orders* li menm.

E *Standing Order* 89 dan nou nouvo *Standing Orders*, i dir ki *Standing Orders Committee*, pou annan okenn fonksyon ki Lasanble i kapab konfer lo li.

Oubyen okenn fonksyon ki li menm li i donn son lekor, pou konsider tou bann propozisyon, ki annan pou fer avek bann lareg prosedir Lasanble, ek *Standing Orders* li menm. Setadir ki li i en Komite ki pandan tou sesyon en Lasanble, i pou regard prosedir e i pou fer propozisyon avek Lasanble, pou sanz prosedir si i neserer.

Oubyen pou anmenn nouvo prosedir si sa i neserer. Setadir ki *Standing Orders Committee*, pou kontinyelman *review* nou bann *Standing Orders* e nou bann lareg prosedir e nou bann pratik Lasanble.

E raport lo Lasanble tanzantan. Parey annan de fwa nou ava vwar. En keksoz i arive, ki pa ti'n ganny prevwar, *Standing Orders Committee* i anvi fer li vin en *order*.

Oubyen amann en *order* ki egziste deza pou pran sa keksoz an realite, i ava fer en

propozisyon avek Lasanble. Ki Lasanble i ava vot lo la. E si i ganny aksepte, sa i ava vin en lareg pratik oubyen en lareg prosedir, oubyen en lareg *Standing Orders* dan nou *Standing Orders*.

Setadir ki, en pti pe parey Konstitisyon. *Standing Orders* i pa *fixed for all time* li. I *subject to* okenn notifikasyon an mezir ki nou pe ale.

Donk sa *Standing Orders Committee*, se pou sa rezon ki Konstitisyon i prevwar ki fodre i annan enn. Akoz lareg prosedir, pratik Lasanble i pa fikse. I *subject to* parey mon'n dir, okenn sanzman, an mezir e nou ale. I dinamik an dot mo.

Standing Orders Committee dan 6nm Lasanble, in ganny latas pou revwar *Standing Orders* an antye. I enn bann dernyen keksoz ki 6nm Lasanble ti fer pou bann Manm ki ti la, zot ava rapel, se pou reorganiz nou *Standing Orders* konpletman.

E pou donn Lasanble en nouvo *set Standing Orders* ki la devan nou ozordi, e ki nou pe servi. E ki ti ganny adopte, le 4 Out 2020 par rezolisyon sa Lasanble. Donk i ase nouvo.

Alors *Standing Orders Committee* dan sa Lasanble ki pe vini, pa pou annan sa latas

pou revwar tou *Standing Orders* an antye. Akoz sa fek ganny fer.

Amwen ki sa Komite i anvi fer li. E sa Komite i ava deside. Sa ki donk sa Komite pou fer, se pou annan son rol prensipal pou vey lo bann lareg e pou aport okenn lamannman ki posibleman nesaser.

Mr Speaker si sa Mosyon i ganny *carried* ozordi, nou ava fer en propozisyon lo lekel ki pou vin Manm lo sa *Standing Orders Committee*. Me nou pa pou fer sa ozordi. Avek ou permisyon, tou bann Komite ki pou ganny formen ozordi, nou ti ava swete, pa nonm ozordi menm, bann Manm ki pou servi lo sa Komite.

Me fer li dan nou nouvo *Sitting, whenever that will be. Semenn prosenn or whatever.* E sa se pou permet ki bann Komite ki nou fer sir ki repartisyon *Membership* sa bann Komite i kouver otan ki posib tou bann Manm ki devan sa Lasanble. Me osi pou en lot rezon. *Standing Orders Committee, Standing Order 89* i dir, e Konstitisyon li menm i dir ki pou annan 7 Manm sa Komite.

E Konstitisyon i dir ki o tan ki posib konpozisyon sa *Standing Orders Committee* pou reflekte balans pouwar ant bann Manm Lasanble. E

balans pouvwar tou bann Komite avek repartisyon pouvwar ant sa 2 parti ki ganny reprezante dan Lasanble.

I pou fer ki tou bann Komite pou annan 7 Manm, *including Standing Orders Committee* ki *Standing Order 89* li menm li i dir i pou annan 7 Manm. Repartisyon alor pou 5 Manm lo kote mazoriter, e 2 Manm lo kote Lopozisyon. Me etandonnen ki *Standing Orders Committee* i enn ki pou tou Lasanble an antye, nou pe propoze lo nou kote, pa pran sa mazorite 5/2, me reparti sa Komite *Membership* sa Komite e plizyer lezot ki nou pou vwar pli tar, dan en fason pli ekitab ant nou 2 parti.

E fer li vin en Komite 4/3. E pou sa rezon donk mon lofis pou bezwen antre an negosyasyon avek lofis *Leader Lopozisyon*, dan sa bann zour ki pe vini. Pou fer sir ki *Membership* sa Komite e bann lezot ankor, i asire ki tou bann Manm i ganny en sans pou partisip dan sa bann Komite.

Alor vwala Mr Speaker, detrwa mo ki mon ti anvi dir. E mon *move* ki Lasanble i aprouv *setting up of the Standing Orders Committee*. Mersi Mr Speaker.

MR SPEAKER

Mersi Onorab Georges. Okenn Manm i oule adres Mosyon? *Ok*, dan sa ka mon a relir Mosyon e nou a pas lo lot. Alor Mosyon i lir koumsa;

Pursuant to Article 104 of the Constitution, this Assembly appoints the Standing Orders Committee, to have the functions set out in Standing Order 89.

Tou Manm ki vot pour, lev lanmen silvouple? Mersi. Mosyon pou apwent *Standing Orders Committee* in pase inanimite avek 34 vot pour, 0 vot kont e 0 abstansyon.

Alor mon deklar Mosyon pase. Mersi. Mosyon swivan nou a retourn ankor Onorab Bernard Georges.

HON BERNARD GEORGES

Mersi Mr Speaker. Dezyenm Mosyon i pou lapwentman *Bills Committee* e i lir koumsa;

In accordance with Standing Order 90(2)(b), this Assembly appoints a Scrutiny of Bills Committee, to enjoy the Terms of Reference of the Committee of the same name in the Sixth Assembly.

Ankor enn fwa Mr Speaker, si sa Mosyon i ganny segonde, mon ti a kontan dir detrwa mo lo la apre ki in ganny segonde. Mersi.

MR SPEAKER

Mersi. Nou apel pou *secondment*. Onorab Clifford Andre.

HON CLIFFORD ANDRE

Mersi Mr Speaker. Bonzour tou dimoun ki a lekout. Mr Speaker mon ti a kontan segonn sa Mosyon. Mersi.

MR SPEAKER

Mersi. Onorab Georges.

HON BERNARD GEORGES

Mersi Mr Speaker. Mr Speaker *Standing Order* 90 i en nouvo *Standing Order* dan nou *Standing Orders*. I pa ti la avan le 20 Out sa lannen, ler 6enm Lasanble ti adopte sa bann nouvo *Standing Orders*. E 6enm Lasanble ti adopte en seri *Select Committees* ki ti pou vin bann *Sessional, Select Sessional Committees*.

Parey mon'n eksplike taler, se bann Komite ki pou ganny formen la e ki pou *last* pandan tou sa sesyon Lasanble. Setadir pandan tou sa 7enm Lasanble ziska ler Lasanble i ganny dizourd oubyen i ariv a son la *fin*.

E enn sa bann Komite, nou ava vwar lezot taler, ki bann lezot Manm i ava propoze, enn sa bann Komite se *scrutiny*

of Bills Committee, ki nou apel, isi dan Lasanble *Bills Committee*.

E sa Komite set en Komite enportan, e set en Komite ki parey son non i dir, i *scrutinize* tou bann *Bills* ki vin devan Lasanble. Setadir tou Prozedlwa ki swa enn ki ganny propoze par Gouvernman, par Egzekitiv, oubyen enn ki ganny propoze par en Manm, en *Private Member's Bill*. I vin devan sa Komite avan ki i ganny debat lo *the floor of the House*. E sa i ganny fer pou 2 rezon prensipal.

(1) se pou fer sir ki ler deba i arive lo sa *Bill*. Sa *Bill* i dan en *shape* ki Lasanble i kapab *subject to* okenn amannman ki okenn Manm i anmennen. I dan en pozisyon, e i dan en *shape* ki i kapab ganny aprouve par Lasanble.

Setadir okenn pti lerer, okenn pti fot ki i annan ladan, okenn kontrovers. In fini ganny asoupi. E dezyenm rezon ki al devan *Bills Committee*, se ki *Bills Committee* i prepar en pti rapor pou bann Manm Lasanble.

Pou eksplike kisisa dan sa *Bill* ki kekfw a i kontrovers. E pou *draw* latansyon bann Manm. Akoz malgre ki tou bann Manm i devret lir tou bann *Bills*, nou rekonnet ki

serten Manm i annan plis lentere dan serten *Bills* ki lezot e zot aprofondi zot lekor en pe plis lo la.

Me ki tou bann Manm i ganny en rapor, ki *sketch out* apepre ki i annan dan sa *Bill*, e okenn problem ki bann Manm i devret *focus* lo la dan deba devan sa Lasanble.

Oubyen okenn propozisyon ki *Bills Committee* li menm pe met devan *mover* sa *Bill*, devan sa Minis ki ansarz sa *Bill*. Pou li konsidere koman en lamannman posib.

Donk i en Komite ki parmi bann Komite, i probableman sa enn ki travay pli longman. Akoz bokou *Bills* ki nou gannyen se bann *long Bills*. E nou antan ki Lezislater, e pa zis bann Avoka dan sa Lasanble, me nou tou nou Lezislater. Nou bezwen asire ki bann *Bills* ler nou vot lo la, nou pe donn avek Lanasyon Seselwa, meyer *Bill* ki nou kapab posibleman gannyen.

Terms of Reference, mon fek eksplike, se *basically* pou fer sa ki mon fek dir. E *Bills Committee* i fer sa, swa dan en miting Komite li menm. Apre ki tou bann Manm Komite in lir sa *Bill*. Me dan serten ka, avek sa Minis li menm, oubyen bann *expert* ki sorti dan sa Minister ki vin rankontre avek *Bills Committee*.

Swa akoz zot menm zot, zot anvi fer li, oubyen a la demann *Bills Committee*. Pou eksplik en pe rezondet deryer sa *Bill*. E akoz serten keksoz pe ganny propoze dan en serten fason. E *Bills Committee* ki mwan mon ti servi lo la dan 6enm Lasanble, nou'n vwar sa prosedir enn ki vreman itil.

Akoz i permet en depouyman tou bann Prozedlwa. Dan en fason ki ler i ariv lo *floor* Lasanble, Lasanble pa bezwen pas parey serten Lasanble presedaman, en kantite letan pou koriz bann pti lerer dan sa *Bill or whatever*. Tousala in ganny fer par *Bills Committee*.

E parey mon dir i sa Komite ki probableman pas plis erdtan pe travay an deor bann *Sittings* Lasanble. E vwala Mr Speaker. Mon propozisyon ozordi se ki Lasanble i aprouv sa Mosyon pou apwent *scrutiny of Bills Committee* koman en *Select Sessional Committee* pou sa sesyon sa Lasanble. Mersi Mr Speaker.

MR SPEAKER

Mersi Onorab. Okenn Manm ti a kontan adres Mosyon? Onorab Aglae. Onorab Aglae.

HON EGBERT AGLAE

Mersi Mr Speaker. Bonzour tou dimoun a lekout e tou Manm Onorab. Mr Speaker mon ti a kontan aport en pti kontribisyon kot i konsern sa Mosyon pou *Bills Committee*. E koman Lezislater parey loter Mosyon in fer sorti. Nou rol se pou adres bann Lalwa ki konsern pei ki Gouvernman i met devan Lezislatif.

E osi bann *Private Member's Bill* ki en Manm li menm li lo son kote i kapab anmennen. E lenportans sa i fer ki pei li menm li, parey nou'n war dan bann sesyon oparavan, kot bokou, Gouvernman in anmenn bokou bann *Bills* devan Lasanble. E menm parfwa in annan serten *overload* dan en sans. Ki keksoz in pa'n neserman mars parey nou ti a swete.

Me mon krwar sa ki enportan la se lafason ki *Bills Committee* li menm li, i pou kapab travay avek Egzekitiv. E nou bezwen konn kapab pli boner posib, etabli bann kalandriye apropiye. Pou fer ki nou pa vwar presyon *as* ki vini akoz i annan serten irzans. E ki diskisyon konsiltasyon neser lo sirtou bann *Bills* ki enportan, ki annan bann lefe lo sitwayen pep Seselwa dan zot lavi toulezour.

Sa bann fason fer, bann *White Paper stage*, bann keksoz koumsa, i bezwen ganny ase letan pou kapab ganny fer. Pou ki kontribisyon neser e bann defayans ki trouve dan bann *Bills* ki vin devan, i kapab ganny adrese san ki keksoz i vin neserman devan *the House* pou *the House* fer tou keksoz li menm.

E kontribisyon piblik i enportan, akoz en Lalwa i pa zis pou Lasanble Nasyonal. Lalwa i pou pep Seselwa ler i ganny fer. E osi mon konstate ki bann travay ki'n ganny fer avek bann Manm ki'n pas lo *Bills Committee*. Mon felisit zot pou travay ki'n fer. E mwan osi mon enn parmi.

Mon felisit sa travay ki *Bills* in fer e zot in fer bokou. E nou konstate avek nouvo Ladministrasyon ki an plas la Egzekitiv, pou annan plizyer bann *Bills* ki pou vini e menm bann amannman. Ki mon krwar nou kapab zwe en rol ase vremen enportan tou Manm. E koman Lezislater nou tou nou bezwen annan en *say* dan en *Bills* ki oule vini.

Menm si nou napa bann *background* legal parey bann Avoka. Me selman nou bezwen ekout lavwa sa pep. Si i annan en *Bills* ki pe vini ki kapab

annan en refleksyon serye, lo son lavi toulezour.

E avek sa Mr Speaker mon siport ankor enn fwa pou sa *Bills, Bills Committee* ganny met devan Lasanble, pou laprouvasyon. Mersi.

MR SPEAKER

Mersi Onorab. Mersi pou ou kontribisyon. Mon lofis a regarde avek Sekretarya dan ki fason nou kapab kominik avek Egzekitiv. E lotorite konsernen pou nou ganny bann *Bills* dan en *timely manner*. E ki mannyer nou kapab ganny li dan en fason ki a ed deliberasyon dan nou Lasanble. Mersi. Okenn lot Manm ki oule adres-? Onorab Clifford Andre.

HON CLIFFORD ANDRE

Mersi Mr Speaker. Bonzour tou dimoun ankor enn fwa. Mon pa pou long. Mon oule *reiterer* sa ki Onorab Aglae in dir e ki ou'n konfirman ki ou lofis pou sey pran sa. Akoz dan lepase nou'n vwar ki in annan bokou bann *Bills* ki'n vin kot nou, dan en letan vreman kourt.

E nou'n bezwen met zefor ekstra, pou nou kapab fer sa prosesis parey Onorab Georges in dir, pou fer sir ki letan i vin devan Lasanble i enn ki Lasanble i kapab dizer byen.

Me mon ti a kontan osi Onorab Aglae in dir ki piblik i bezwen partisipe. Oubyen nou pe fer en *Bill* ki konsern piblik.

Mon krwar nou bezwen osi annan en pe letan ki donn nou koman bann Lezislater, pou nou al kot nou bann dimoun. Pou nou osi ganny zot kontribisyon dan sa bann *Bill*.

E pou get zot bann pozisyon, zot bann lobzeksyon. Akoz souvandfwa, ki mannyer in marse dan lepase, se ki ler in vin kot nou, nou'n oblize pran konsiderasyon sa *Bill* la, *then and there*. Nou gannyen enn de pti *text* kot bann dimoun pe dir nou zot annan serten rezervasyon lo la.

Me selman sa letan ki nou annan pou nou kapab konsider nou bann lobzeksyon, zot bann lobzervasyon i minim. E ti a bon ki kekfwad dan sa nouvo klima ki nou ladan, nouvo Ladministrasyon, nouvo Gouvernman Sesel parey Prezidan in dir nou yer, nou get en pti pe ki mannyer pou vin pli enklizif avek nou bann elektora ki'n met nou o pouvwar.

Avek sa detrwa mo Mr Speaker, mon ti a kontan dir ki bann nouvo Manm ki pou ganny mete lo *Bills Committee* i en leksperyans eksepsyonnel ki zot bezwen *cherish*.

E mon sir i pou al dan zot CV koman en keksoz ki neserer e ki a laoter. Alors zot *welcome*. E zot pou bezwen travay bokou parey *LGB* in dir. Mersi.

MR SPEAKER

Mersi Onorab. E ou kontribisyon in ganny note. Okenn lot Manm? Onorab Sebastien Pillay.

HON SEBASTIEN PILLAY

Mersi Mr Speaker, bonzour e bonzour tou koleg Onorab e bonzour tou dimoun ki a lekout. Mwan mon oule fer en pti pledwari avek tou Manm lo Lasanble vizavi *Bills Committee* e vizavi bann Lalwa ki vin devan Lasanble. E mon dir sa baze lo mon leksperyans personnel ki mwan mon'n gannyen koman en Manm *Bills Committee* dan Lasanble.

Mon krwar sa ki tou Manm i bezwen fer en zefor pou fer, se ki pou pa zanmen per Lezislasyon ler li i vin devan Lasanble. *No matter* ki manner in ganny ekrir, *no matter* langaz ki in ganny servi pou ekrir li, rod leklersisman, rod fason pou konpran li.

Akoz i pou enportan e i pou ed zot pou kapab asimil bann keksoz ki ganny dir o tour sa Prozedlwa oubyen bann keksoz ki pou ganny prezante

dan sa Prozedlwa. Mon dir zot sa, akoz i posibil pou fer li.

Dan bokou ka mon'n kapab fer li, dan bokou ka bann lezot koleg lo *Bills Committee* in kapab fer li. Malgre ki nou pa bann dimoun ki *train* dan domenn legal. Me zot pou war. E bann ki'n dan 6em Lasanble i kapab ateste ki i annan posibilite pou zot fer li. Rezon mon dir zot sa, set akoz i pou annan lenstans kot zot pou anvi anmenn sa bann Prozedlwa dan zot distrik.

Ouswa fer en miting piblik lo la. E mon krwar i en lapros ki nou bezwen adopte, pou nou anmenn travay Lasanble pli pre avek nou bann sitwayen. I ava en keksoz i ava ed nou dan lonterm.

E mwan mon ti a kontan azoute ki *Bills Committee* pandan 6em Lasanble, in en Komite ki'n travay dan en fason pirman non partizan.

E ki mon ti ava swete ki sa lapros i kontinyen. Pou ki sa Lalwa ki Lasanble a lafen di zour, malgre i pou annan serten politik ki pou ganny fer lo serten Lalwa i ineskizab. Akoz apre tou nou politisyen isi dan sa *forum* ki la. *Still* selman i ava meyer Lalwa posibil ki nou kapab donn Lepep Seselwa.

So mon ti a kontan ankouraz bann Manm, malgre

ki i annan en *Bills Committee*, zot osi partisipe aktivman. Regarde ki mannyer zot kapab konpran plis ler bann Prozedlwa, pe vin devan Lasanble. Mersi Mr Speaker.

MR SPEAKER

Mersi Onorab. Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun. Mr Speaker si i annan en landrwa. Koman en Manm Lasanble dan 6enm Lasanble ki mon war mwan mon'n aprann en kantite keksoz se atraver *Bills Committee*.

Mon pa ti en Manm sa Komite mwan, solman letan zot ti *extend* lenvitasyon pou lezot Manm vin swiv zot miting, mon ti toultan fer li mon devwar pou mon ale.

Akoz? Parski dan zot Komite letan ou war mannyer zot *operate*, zot pe al *behind the scene of* sa *Bill*. En *Bill* letan Gouvernman i anmenn devan Lasanble, i annan en *purpose*.

I annan en *financial footprint*. I annan lezot rezon akoz. E koman Lezislater nou rol prensipal se pas Lezislasyon avan reprezantasyon, e *oversight*.

Donk sa i en landrwa ki mon ti ava *advise* bann Manm, sirtou bann ki nouvo, pou angaze. Akoz la i en landrwa kot bann teknisyen ki'n travay lo sa *Bill*, bann zofisye sa Minister i vini eksplik rezondet, zot pe pas dan sak Lartik. Souvandfwa *Attorney Zeneral* li menm i ti la. E i en lekol, en lekol gratwit kot ou aprann en kantite keksoz.

Donk mon ti ava ankouraz zot pou partisip dan sa prosesis. Dan bann dernyen semenn, akoz *COVID* ti restrikte lakantite Manm ki ti kapab asiste. Donk mon'n perdi en pe sa privelez. Me apre konsernan *Bill* osi, enterven an avan mwan in dir poudir serten Manm parfwa i per, vre zot pa merit per, zot merit *dive right into it*.

Be solman ankor koman en konsey pou bann nouvo. Letan nou fer letour nou distrik, nou konn nou distrik, nou konn bann dimoun, zot konpetans. Kit en not pou dir entel i dan Sekter Lagrikiltir. Entel i dan konstriksyon, entel i dan-. Zour sa *Bill* prezan i vini, ki ou war i dan sa *field*, ou *call* zot. Akoz nou, nou la anndan, nou annan nou spesyalizasyon nou osi. Nou pa konn tou keksoz. En fason pou nou reste an kontak avek nou bann dimoun

dan nou *constituency* se zisteman letan bann *Bills* i vini.

La i ava en moman pou *call* zot e dir i annan tel sa, nou a zwenn, nou a pas lo la. E zot donn ou bann pwen ki souvandfwa ou anmennen, e dimoun i dir sa boug i so.

Be i akoz en dimoun laba in donn ou bann konsey, bann largiman. Ou paret s aki zot in dir konmsi parey en peroke, non. Ou *come up* avek ou prop analiz. Me selman i en fason pou ou angaze avek ou *constituent* e bann profesyonnel Seselwa, ki nou pou met en kantite lenportans lo zot partisipasyon dan nou travay dan 7enm Lasanble.

Donk lo sa 2 pwen, mon a repete pou bann Manm angaze avek *Bills Committee* ler zot pe fer zot bann Komite. Si i envit zot pou vin partisipe, partisipe vin ekoute e swiv bann deliberasyon. E dezyenmman i en fason pou reste an kontak avek zot bann dimoun dan zot *constituency* ki kapab ede pou anmenn bann pli bon kontribisyon dan ou prezantasyon *on the floor*. Mersi bokou.

MR SPEAKER

Mersi Onorab pou ou kontribisyon. Mon pa'n vwar

okenn lot Manm. Wi Onorab Georges.

HON BERNARD GEORGES

Si napa lezot Manm Mr Speaker. Mon ti a kontan dir detrwa parol pou *sum-up*.

MR SPEAKER

Onorab Georges, *yes*.

HON BERNARD GEORGES

Mersi Mr Speaker. Mr Speaker mon remerisye tou bann Manm ki'n koz an faver sa Mosyon. E pandan ki mon'n ekout zot mon'n realize ki i annan detrwa pti keksoz ki mon merit dir. Premyerman en pwen ki'n resorti e ki absoliman esansyel, se ki i annan en kalandriye byen ordonnen.

E la mon ava demann ou lofis ansanm avek mwan, pou pas sa mesaz kot Egzekitiv. E fer sir ki nou annan en kalandriye e ki ganny respekte e ki bann *Bills* ki vin devan nou, nou pa vwar en pe sa ki ti arive dan dernyen Lasanble.

Kot *Bills* i arive an retar e nou ganny demande pou pas zot vit, akoz i annan serten *deadline*. Nou konpran ki Egzekitiv i annan son kalandriye pou li menm, e nou respekte sa.

Me mon krwar nou'n devret dan sa moman o

komansman menm angaz avek Egzekitiv avek Biro *Attorney Zeneral*. Pou fer sir ki nou annan sa bann *Bills* i arive, pou ki *Bills Committee* i kapab *scrutinize* zot. E an plis ki sa parey in ganny dir, anmenn *Bills* dan nou bann distrik. E ganny *advice* nou bann *constituent* ki'n anvoy nou osi lo ki zot krwar lo sa *Bills*. Alor sa se premye keksoz mon krwar ki nou devret fer resorti.

Dezyenm pwen, se ki i pou annan, parey in annan dernyen, dan dernyen Lasanble, bann gro *Bills* ki pou vin devan nou. E mon antisipe ki i pou annan serten *constitutional amendments*. Nou annan deza en bann ki ti arive e ki pou sertenman retourn ankor. Nou pou annan osi probableman *Companies Act* ki mon konnen in dan *pipeline* en pe letan.

Alor nou pou annan detrwa gro *Bills*. Alor mon ava demann avek bann Manm ki pou al lo sa *Bills Committee*, pou prepar zot lekor pou travay osi dir ki *Bills Committee* dernyen Lasanble ti travay.

Trwazyenm keksoz, mon krwar i enportan e ou ava eskiz mwan ki mon pa'n fer sa sorti pli boner, se ki enn nou bann rol, e parey tou dimoun i konnen, nou annan 3 rol dan

Lasanble i annan 3 rol. I annan en rol *oversight*, i annan en rol reprezantatif. Me son rol prensipal se *to legislate*. E se pou sa rezon ki nou apel nou lekor sa Brans Lezislatif.

Enn nou bann premye rol se pou vin sa landrwa kot Gouvernman i depann lo la pou son program Lezislatif. E nou tou an tan ki Manm fodre nou pran *great pride* dan lefet ki nou bann Lezislater. E se nou e selman nou anba Konstitisyon ki annan pouvwar Lezislatif dan pei. Napa lezot dimoun ki i annan.

E set en pouvwar enportan ki nou egzers pa lo nou kote pou siport Gouvernman anver kontre tou e lo zot kote propoz Gouvernman anver kontre tou. Me koman en Lasanble dan son mazorite pou *legislate*, pou ed Gouvernman pas son program Lezislatif lo lekel in ganny elekte.

Donk ankor enn fwa la, mon repet sa parol ki mon ti dir semenn pase. Se ki fodre nou regard nou Lasanble, pa parey 2 adverser ki nou ete, e nou pou fer politik.

E annan de fwa nou pa pou tonm dakor e nou pou *vote along party lines*. Me pli gran ki sa, koman en Lasanble ki la koman en *check and balance* lo sa 2 lezot brans Gouvernman.

E finalman mon krwar Mr Speaker si ou permet mwan, mon ti ava kontan profit sa lokazyon pou remersye bann Manm *Bills Committee* dan 6enm Lasanble, ki mon'n ankor enn fwa manke pou fer taler, pou zot travay e pou zot devouman. Mersi Mr Speaker.

MR SPEAKER

Mersi Onorab. Avek sa nou a kapab pas lo lot. E mon a relir Mosyon. *In accordance with Standing Order 90(2)(b), this Assembly appoints a Scrutiny of Bills Committee, to enjoy the Terms of Reference of the Committee of the same name in the Sixth Assembly.* Nou a pas lo vot.

Tou bann ki vot pour lev lanmen silvouple. Mersi Madanm Clerk. *Scrutiny of Bills Committee* in ganny aprouve par Lasanble. Avek vot inanim, 34 vot pour, 0 vot kont e 0 abstansyon. Alor mon deklar Mosyon pase. Mersi. Pou Mosyon swivan nou a pas Onorab Sebastien Pillay.

HON SEBASTIEN PILLAY

Mersi Mr Speaker. Mr Speaker Mosyon i lir koumsa. Anliny avek Lartik 104(1)(a) nou Konstitisyon ek *Standing Order* 88, Lasanble Nasyonal i etabli

'The Finance and Public Accounts Committee.

Mr Speaker Konstitisyon i prevwar ki dek ki i komans sesyonnen, Lasanble Nasyonal i etabli 2 Komite. Lot nou'n koz lo la bomaten. E sa enn Komite *Finance and Public Account Committee.*

Sa Komite i annan en lenportans krisyal dan, si ou oule, rol *scrutiny oversight* ki Lasanble i annan pou li fer. I en Komite ki vreman enportan. E i en Komite i annan en travay, en latas enorm.

Par lefe ki se sa menm Komite ki bezwen fer *oversight* an se ki konsern depans piblik. I osi bezwen fer *scrutiny* an se ki konsern lafason ki bann *public expenditure* pe ganny fer, pou asire ki i annan *value for money.*

Savedir Gouvernman pe ganny meyer retour pou lenvestisman ki i pe fer. E trwazyenmman, i sa Komite ki osi bezwen depouy rapor Oditer Zeneral. I pa en latas fasil, i en Komite ki bezwen sesyon pou bokou letan. I demann en travay entans. Me mon bezwen soulinyen, ki selman i bezwen en Komite ki travay dan tout latransparans.

E san en pran en lapros partizan. Avek sa Mr Speaker mon, *I beg to move* ki nou form

Komite *Finance and Public Accounts*, pou nou 7enm Lasanble. Mersi Mr Speaker.

MR SPEAKER

Mersi Onorab. Okenn Manm ki oule adres Mosyon? Onorab Churchill Gill.

MR SPEAKER

Abe, eskiz mwan. Eskiz mon Onorab. Nou a pas lo *secondment* avan silvouple. Ou pe second li. *Yes*.

HON CHURCHILL GILL

Thank you Mr Speaker. Bonzour tou Manm e tou dimoun a lekout. Mr Speaker Mosyon *seconded*.

MR SPEAKER

Mersi Onorab. Prezan eski i annan okenn Manm ki oule adres Mosyon? Wi Onorab Arissol avek Onorab Richard Labrosse. Onorab Sandy Arissol ou a komanse.

HON SANDY ARISSOL

Mersi Mr Speaker. Bonzour tou Manm. Mr Speaker mon ti a kontan dir 2 mo lo Mosyon anmennen par Onorab Pillay.

Parske koman en Manm 6enm Lasanble, mon'n osi in en loner toultan letan *FPAC* ti pe

asize pe ekout bann deliberasyon.

I enn bann Komite ki mwan mon ti kontan swiv, senpleman pou mon konesans personnel koman en Manm. E osi an menm tan ou ganny serten lenformasyon ki konsern ou distrik oubyen ki konsern pei. Be mon pou bezwen dir poudir Komite sortan enkli Onorab Pillay ki loter Mosyon, zot in fer en travay ekselan a mon avi dan 6enm Lasanble. I annan plizyer rapor ki zot in soumet avek Lasanble Nasyonal.

I annan plizyer lenvestigasyon ki zot ti fer koman en Komite. Zot in enterakte avek plizyer Minister, avek plizyer endividi. E zot in annan en rapor ase ekselan avek Oditer Zeneral.

E osi letan zot ti pe pas osi lo rapor Oditer Zeneral ki nou gannyen tou le lannen. Mon krwar Komite *FPAC* in enn sa bann Komite avek plizyer Komite Lasanble, ki'n zwe en rol enportan dan nou 6enm Lasanble.

E sa in montre poudir 2 kote latay, ki ti konpri Lopozisyon avek Gouvernman, letan zot in asiz ansanm, i annan en kantite keksoz ki ti deroul byen. En kantite lenformasyon ti vin devan an

relasyon avek nou pei e osi avek sa ki zot ti pe rode koman en Komite.

E mwan mon krwar bann Komite sortan, nou bezwen, bann Manm lo Komite sortan nou bezwen dir zot mersi bokou pou sa travay, sa standar ki zot in set ki zot in kit la.

E mon krwar sa i en legzanp pou nou 7enm Lasanble, pou bann Manm ki ti a kontan zwenn sa Komite. Mon krwar i annan en Komite ki dimoun piblik deor in apresye.

I en Komite ki'n ganny kantite prominans, in ganny en kantite letan lo televizyon parey nou dir, pou dimoun kapab swiv vreman ki pe arive. E mon krwar pou en tel Komite i pou enportan ki bann nouvo Manm ki la, enkli bann ansyen Manm, enkli mwan menm nou, pou nou kontinyen swiv sa Komite.

E donn li *full* lenportans. E parey Onorab Georges ti pe dir o komansman, mon krwar *FPAC* i enn sa Komite, kot nou lo nou kote koman Gouvernman, nou krwar i ava enportan. Pou olye baze lo nivo lafors Lasanble parey nou Konstitisyon i permet nou. Be i ava enportan pou nou revwar pou nou donn zot 3 e nou, nou ganny 4 lo sa kote.

E avek *Leader* Lopozisyon a latet, mon krwar zot a

kontinyen kit sa standar e pou fer sir ki sa Komite i kontinyen delivre. E i prezant avek Lepep Seselwa, sa ki zot pe ekspekte an referans avek son *Terms of Reference*. Alor pou sa Mr Speaker, mon ti a kontan prezant sipor pou sa Mosyon. E mon ti a kontan demann lezot Manm.

Kekfwa bann ki en pe pli eksperyans, koz en pe lo sa Komite. Donn bann nouvo Manm e bann dimoun ki pe ekout nou deor, en pti pe ankor kwa ki nou pe ekspekte avek sa Komite. Oubyen kwa ki'n arive an relasyon avek Komite *FPAC*, parey nou tou nou konn li. Mersi bokou Mr Speaker.

MR SPEAKER

Mersi Onorab. Onorab Richard Labrosse.

HON RICHARD LABROSSE

Bonzour tou dimoun. Mersi Mr Speaker. *FPAC* li menm li parey son pti non in dir, i ti en Komite dan 6enm Lasanble ki ti vreman popiler parmi dimoun deor. Le senp rezon ki Seselwa zot kontan konn laverite e osi swivre en pe ki pe pase. Sirtou ler nou pe koz *tax payers money*, nou larzan ki Gouvernman ti pe zere.

Me i annan bokou ki'n ganny sorti pandan 6enm Lasanble. E avan mon al pli lwen osi parey mon koleg in fek dir la. Nou bezwen osi rekonnèt travay sa bann dimoun ki ti lo sa Komite. Zot in fer louvraz vremen profesyonnel, san lafreyer. E zot in met tou keksoz devan. Me selman en keksoz ki bokou dimoun deor i pe demande, *so what next*, sirtou bann, dan bann zesyon larzan ki'n mal ganny zere. Ki pou arive? Espesyalman mon rapel ler mon ti lo *camping trip*, i annan en tantin 75an, anler Copolia ti demann mwan sa kestyon. Be la sa bann larzan ki'n ganny perdi, ki pou arive avek?

Eski pa ti a mal war pou nou remet dan nou larzan Fon Sekirite Sosyal? Mon krwar Onorab Pillay kekfwà ou ti ava kapab donn nou en pti pe laliny dan sa laliny. Mersi Mr Speaker.

MR SPEAKER

Mersi Onorab. Onorab Egbert Aglae.

HON EGBERT AGLAE

Mersi Mr Speaker. Mr Speaker mon krwar FPAC li menm li i en Komite ki vremen enportan. Kot i ganny en lafors legal anba nou Konstitisyon

anba Lartik 104. E i enn bann Komite, ki i pa tro pas parey bann Komite. Akoz anvi ki i annan son lafors legal anba li. Kot ou kapab menm pe *summon*, parey Lakour i fer. *Summon* bann departman, bann Minister, pou vin reponn kestyon kot i konsern zesyon finans pei.

E dan sa moman ki nou ladan, mon krwar i enportan osi ki piblik an zeneral e nou menm koman bann Lezislater, nou konstate poudir zesyon finansyel avek limitasyon resours ki pei i annan ozordi, e kot Gouvernman pe fonksyon plizoumwen lo en defisit, en *balance sheet* defisit, i fer ki i enportan ki zesyon sak sou i ganny servi dan en fason ki byen e dan en fason priyorite.

E li FPAC i ava kapab zwe sa rol. Etandonnen ki Konstitisyon i fer ki se Lopozisyon ki pou *Chair FPAC*. E ki i en fason demokratik osi.

Pou ki Lopozisyon i pran responsabilite pou vwar ouswa met tors parey nou kontan dir. Lo lafason ki Egzekitiv i delivre kot i konsern finans.

E sa osi i pou anmenn en kolaborasyon, sirtou dan bann letan Bidze ki enportan. Kot i anmenn kolaborasyon kot si nou war poudir i annan en pti pe dekalaz, ouswa en pti

reazisteman ki bezwen ganny fer.

Ouswa menm donn Gouvernman en pe *leeway*. Tousala i kapab ganny fer. E FPAC koman sa Komite ki osi la pou kapab, pa zis gete ki pe ganny fer.

Me osi annan son laspe edikasyonnel, sa laspe sipor, sa laspe osi kot i kapab donn bann propozisyon Gouvernman lo serten fason fer, avek kot i konsern zesyon finansyel.

E anvi ki nou anba en nouvo ladministrasyon, i annan nouvo Minis, bann lezot sekter, bann lezot departman osi pou annan bann nouvo lapwentman ki ganny fer ofir an mezir Gouvernman i fonksyonnen.

Nou santi poudir bann ki pou pran bann pozisyon i bezwen met zot pare osi pou kapab reponn serten kestyon kot i konsern zesyon finans. E osi parey enterven an avan mwan, *from* Labrosse, in fer resorti ki in annan, FPAC i annan en travay ki in deza komanse ki i pa aret la.

E bann lenformasyon, sirtou si i annan lenvestigasyon ki ankor *ongoing*, i bezwen kontinyen *ongoing*.

E avek letan apropiye ler bann sesyon lenvestigasyon i ganny konklir, lenformasyon i bezwen ganny fer piblik. E sa i

pou rol *Leader of the Opposition* pou li kapab met sa bann lenformasyon o piblik.

E mwan mon senserman krwar poudir, nou pa la pou vin kasyet nanryen. Sa ki devret ganny dir i bezwen ganny dir, lenvestigasyon i bezwen ganny konklir. E mon krwar kot i konsern nou sou ek *cash*, tou piblik zorey i ouver, lizye i ouver, i anvi konnen ki'n ganny arive avek son sou ek *cash* ki li in kontribye anver *tax*.

E avek sa Mr Speaker mon ava donn mon sipor sa Mosyon pou etablisman FPAC anba Konstitisyon. Mersi.

MR SPEAKER

Mersi Onorab. Onorab Gervais Henrie.

HON GERVAIS HENRIE

Mersi Mr Speaker. Mr Speaker enn bann keksoz ki mon apresye, se ki i pou fer katriyenm dimoun ki ava ganny *Chair* sa Komite, katriyenm *Leader* Lopozisyon. Sete dan premye fwa ki nou ti war sa pozisyon ganny konfyete a Lopozisyon, ti dan 5enm Lasanble, Anbasader David Pierre ki ti vin premye *Chairman* FPAC, ki *Leader* Lopozisyon.

Malgre konvansyon bann pei *Commonwealth* an

partikilye ki ti toultan rekomann zot bann Manm pou donn sa *seat* Lopozisyon. Akoz zisteman i fer plis sans. Ou pa dan brans Egzekitiv, ou zot oponan politik, ou pou annan plis viger pou regard zot pre, fason zot pe zer kont piblik.

Be savedir depi premye Lasanble ziska 4enm, in annan en kantite rezistans lo lapar parti ki ti o pouvwar. Me evantyeleman in arive. Apre letan Anbasader Pierre in ale, mon pa konnen si Ms Francesca Monnaie ti ganny sans vreman fer sa travay. Parski i ti la en pti gin letan li. Apepre 4 mwan.

Me letan 6enm Lasanble in vini, kot Prezidan Ramkalawan ki ti dan sa *seat*. Vreman en kantite travay in ganny fer. Mon ava felisit tou bann Manm. Mon krwar zot ti en lekip kolektiv ki ti annan en pasyon pou fer sa travay ki zot ti fer. E nou sanse ki dan 7enm Lasanble i ava reste detrwa Manm.

Lo nou kote ti annan Onorab Terence Mondon. I annan en lot ki parski Onorab Ramkalawan avek Onorab Afif pa la. Be i annan en katriyenm Manm, anr, nou'n perdi 3. Apre *Minister* Ferrari osi in ale. Be lot kote latab i annan Onorab Pillay, Onorab Gill ki ankor la.

Donk mon pe prevwar en kontinyite. Akoz *institutional memory*, i pou bon pou sa Komite.

Donk mon swet Onorab Pillay tou de bon dan son travay. Mon konnen poudir i en dimoun ki pran keksoz a ker letan i fer. Donk, *I wish you all the best*.

Sa ki mwan mon ti ava demann sa Komite pou osi pran kont;- mon konnen zot pou kontinyen fer swivi lo rapor Odirer Zeneral. Me mon krwar i osi enportan pou zot get ki bann Polisi ouswa bann, anndan dan Gouvernman, ki bann striktir zot in met an plas, pou asire ki fon piblik pe ganny zere byen?

E sirtou, sirtou akoz konmela nou pe koz Bidze manner i ganny fer, i annan bann lobzektif, bann target. Alor eski tou sa bann *MDAs* pe zwenn zot target, selon resours finansyel ki *tax payers* Seselwa pe met a zot dispozisyon?

E koumsa pou nou kapab, an mezir ki lannen i ale, nou demokrasi i evolye, nou vin en pe pli disiplin dan nou zesyon kont piblik. Enn bann keksoz ki mon'n deza dir dan sa Lasanble, e sa i korek sa. Ou konnen, par egzanp dan bann dimoun ki *procure* bann keksoz pou tou bann *MDAs*. Parfwa

enn ler i annan bann larzan ki ganny, zot zwe avek sa.

E mon'n deza rakonte dan sa Lasanble, ki mannyer bann marsan i rakont mwan. Par egzantp zot kapab vini, zot fer bann *procurement*. En keksoz i ariv R90, i dir be met pou R100, akoz li i ganny sa R100.

Swa i, parfwa zot demann menm sa marsan larzan. Ouswa par egzantp si ou ti bezwen en sel, separeman 100 pake *toilet paper* pou en antite. Zot demann 110, 10 pa arive dan son destinasyon final. Sa i bann keksoz ki mon pe demann sa *FPAC* ki pe vini, pou regard de pre sa bann zafer.

E kot nou kapab koup tou sa bann lemorazi finansyel ki pe arive, i pou bon pou nou Lasanble. I pou bon pou piblik Seselwa. I pou bon pou Sesel, akoz nou resours i limite. E nou pa kapab *afford* perdi larzan an bonnavini. E tou bann move pratik depi yer, nou'n sipoze arete. E mon pe kont lo sa Komite pou fer sa travay bokou, sirtou pou egzamin poudir ou annan target, ou'n ganny tan larzan.

Eski ou pe zwenn, e ki mannyer nou kapab fer sir ki plis fiskal, disiplin fiskal i ganny aplike dan Gouvernman. Mersi Mr Speaker.

MR SPEAKER

Mersi Onorab. Onorab Clifford Andre.

HON CLIFFORD ANDRE

Mersi Mr Speaker. Mr Speaker *FPAC* i en Komite ki parey in ganny dir, i annan en gran lenportans pou li travay avek Egzekitiv. I pou enteresan pou vwar, nou'n ganny dir ki *FPAC* i pou vwar rapor Oditer Zeneral. I pou enteresan pou vwar ki la *Leader* Lopozisyon ki pou *Chair* sa Komite.

E rapor Oditer Zeneral pou en rapor ki baze lo en Egzekitiv ki ti la depi avan. So an dot mo, i pou annan en *scrutiny* sa rapor lo Gouvernman. Pa Gouvernman dizour, ek Gouvernman ki ti la avan.

E nou'n tann Onorab Labrosse kot in dir dan son konpanyy in annan kestyon ki'n ganny demande lo rezilta apre en lenvestigasyon, en *summons* ki'n ganny fer pou bann departman apropiye vin devan *FPAC*.

I osi enportan kekfwa nou etablir sa lyen, sa koneksyon letan *FPAC* i fini analiz serten keksoz, oubyen i komisyon en rapor lo serten keksoz ki'n pase dan Gouvernman.

I annan sa lyen ki apre bann prosedir, oubyen bann

steps pou remedye sa aksyon, i ganny etabli avek nouvo administrasyon. Mon krwar i ava neser ki sa i en latas ki sa nouvo *FPAC* i bezwen mete pou vwar kote nou ale, ler nou sorti en *investigation*. E nou kapab vwar rezilta, swa sa larzan i ganny retournen, oubyen serten aksyon apropiye i ganny pran avek sa bann dimoun ki konsernen.

Mr Speaker i enportan pou dir ki Onorab Aglae in dir nou ki *FPAC* i kapab somonn, parey en Lakour. Me i enportan note ki tou Komite Lasanble, i kapab somonn okenn departman anba Konstitisyon.

So i en privez ki ganny donnen avek tou Komite. Irespektiv ki son non, nou pou al lo defans apre pli tar, irespektiv ki son non. Pou li kapab eklersi son lekor lo serten keksoz ki konsern son Komite. Me parey in ganny dir, mon krwar i enn bann Komite ki pep Seselwa in fer sir i ekoute. E ti a bon ki nou kontinyen annan sa *live coverage* letan *FPAC* pe ganny ekoute parey Lasanble.

Ki a fer ki bokou dimoun i ava pe ganny enformen li ki pe pase e ki *outcome of bann interviews* oubyen bann *summons* ki zot in fer devan zot. Avek sa Mr Speaker, mwan mon

pou donn mon sipor. E mon pou donn tou dimoun, mon sir ki nou tou nou pou fer parey pou nou aprouv sa Komite. Epi bann Manm parey Onorab Georges in dir, *LGB* in dir ki i ava ganny mete.

E pou fer sir ki sa levantay leksperyans i ganny pran *onboard* par bann Manm ki dan Lasanble. Avek sa mon oule remersye ou Mr Speaker.

MR SPEAKER

Mersi Onorab. Onorab Wavel Woodcock.

HON WAVEL WOODCOCK

Mersi Mr Speaker. Bonzour tou koleg Onorab e tou dimoun a lekout. Mr Speaker *FPAC* 6enm Lasanble in vreman *set en high standard* pou bann lezot *FPAC* dan bann Lasanble ki pou swiv.

Leader Lopoziyon sa letan ki ozordi Prezidan Larepublik ki ti *Chair* sa Komite. E osi nou *VP* ki ti *Vis-Chair* sa Komite ansanm avek son lekip, ti fer bon travay Mr Speaker.

Sirtou kot i konsern parey mon koleg Onorab Loizeau i kontan dir, pou kler tors lo kof leta. Lo zesyon *tax payers money*, larzan Lepep Seselwa.

Pou fer sir ki larzan pep Seselwa pe ganny servi dan en

fason ki byen. Ki bann diferan departman gouvènmantal zot pe servi Bidze ki zot gannyen dan en fason ki drwat, dan en fason ki byen. Kot larzan pa pe ganny gaspiye.

Mr Speaker non selman ki FPAC i son rol se pou vey kof Leta, lafason ki larzan i ganny depanse. Me FPAC dernyen Lasanble, 6em Lasanble, ti zwe en rol vreman enportan kot i konsern ekspoz bann koripsyon ki'n arive dan plizyer antite, departman Gouvènmàn.

Parey nou ti war dan FIU, kot ti annan bann koripsyon ti pe deroule. Kot nou ti war plizyer bann anormalite. Bann keksoz mal ti pe arive. Ki sa in ede ozordi sov nou pei plizyer milyon Roupri. Annefe non selman FPAC in fer sa rol. Me FPAC in osi ede fer antre larzan dan Kof Leta. E sa en rol ki sa nouvo FPAC osi pou kapab fer.

Parey, lafason ki ti ganny fer sa se atraver bann diferan miting ki zot in fer. Mon rapel ti annan en miting ki ti ganny fer, FPAC ti fer avek L'Union Estate La Digue. Kot L'Union Estate pa ti pe fer en gran profi. E la ozordi nou vwar ki L'Union Estate pe fer menm *up to* R10 milyon profi.

Nou'n war osi Botanical Garden, kot osi ti annan bann

koripsyon ki ti pe deroule. Kot ti napa gran larzan ki ti pe antre dan kof Leta. Ki ozordi, mon krwar reveni ki sa departman pe fer i anviron R7 ekek milyon.

E Mr Speaker, FPAC osi pou annan en rol enportan pou zwe pou fer sir bann departman Gouvènmàn pa pe fer gaspiyaz larzan Lepep Seselwa. Ki ozordi nou pe swiv, nou pe servi, nou depans i baze lo program.

Performance PPPB, sorry eskiz mwan. Ki vreman enportan ki nou *swiv* li dan en fason ki byen. E bann program ki bann diferan antite, departman i swiv, i bezwen fer sir ki lafason ki larzan i ganny depanse, i ganny depanse dapre zot program;-dapre lafason ki larzan i ganny bidzete.

E alor FPAC i son rol pri mondyal e enportan pou fer sir ki tou bann departman, zot depans larzan ki Lepep Seselwa i donn zot, dan en fason ki byen, dan en fason ki ekitab, dan en fason ki tou Seselwa an zeneral i benefisyè. Avek sa 2 mo Mr Speaker, mon pou siport Mosyon pou etabli sa Komite. Mersi.

MR SPEAKER

Mersi Onorab.
Churchill Gill.

Onorab

HON CHURCHILL GILL

Mersi Mr Speaker. Parey tou Manm in fer sorti sa Komite i en Komite tre enportan. Me selman mon anvi met en keksoz devan *LGB*. Pou vwar si i annan serten keksoz i kapab fer lo la. I kler dan Konstitisyon ki *ratio* i dapre lafors politik. Me selman dan sa enn *equation*, Egzekitiv avek Lezislatif i menm parti ki dominant.

I lekotrer avek 6enm Lasanble. Akoz 6enm Lasanble Komite *FPAC* i ti ganny *Chair* par *Leader* Lopozisyon, me selman konpozisyon ti dominan par Lopozisyon. *Whereas* la, i le kontrer. Alors mon propozisyon pou *LGB*, se si nou vremen oule donn *FPAC* son pouvwar ki i devret annan, mon ti a demande ki *LGB* i sey diskrit avek bann lotorite konsernen.

Nou konnen i deza dan Konstitisyon. So i kapab *warrant* en sanzman. Me selman mon pe propoze ki i annan en diskisyon pou vwar si nou vremen anvi *FPAC* fer travay parey nou oule.

Ki konpozisyon *ratio* i a tonm parey i ti ete dan 6enm Lasanble. Akoz parfwa i annan serten desizyon ki Komite i bezwen pran. E si, menm si *LOTO* pe *Chair FPAC* e konpozisyon *ratio* i 4/3 i vedir i annan posibilite kot serten

keksoz si nou oule aprofondi, nou pou ganny serten difikilte, zisteman, akoz nou *ratio* i 4/3. Mersi.

MR SPEAKER

Mersi Onorab. Avek sa, mon a, eskize. Ale, mon a pas laparol Onorab Bernard Georges.

HON BERNARD GEORGES

Mersi Mr Speaker. Mr Speaker mon'n ekout avek bokou lentere bann entervansyon lo sa Mosyon. E napa okenn dout ki sa Mosyon pou pase. Me mon ti a kontan profite pou azout en pti kontribisyon lo mon prop par. Mon krwar en keksoz ki fodre nou realize. E Onorab Churchill Gill in fer sa resorti tre byen.

Se ki *FPAC* son rol se pou vin sa avangard enn sa 3 rol ki en Parlman i zwe. Taler nou ti koz lo rol Lezislatif. Me dezyenm rol sa Lasanble, okenn Lasanble, se sa rol *scrutiny*.

E nou tou nou konnen ki en Lasanble i egziste pou *scrutinize* travay Gouvernman. E *FPAC* se sa Komite Lasanble ki fer sa dan en fason pli vizib, si mon kapab dir li koumsa. Akoz i pe regard kont Gouvernman, kont piblik e i pe

scrutinize li. E donk i en Komite enportan.

E se pou sa rezon ki i ganny *Chair*, parey Onorab Gervais Henrie in fer nou konpran, dan bann pei *Commonwealth* koman en pratik par *Leader* Lopozisyon.

E nou, nou'n fer antre dan nou *Standing Orders* an Out sa lannen, ki sa pou vin en koutim, e nou'n mete, "*the, Chairperson will customarily be the Leader of the Opposition.*"

Mon krwar sa set en koutim, met an pratik ki nou pa pou retourn lo la ankor. E nou ava sertennman Onorab Gill, si ou permet mwan, mon ava adres li atraver ou Mr Speaker, konsider konpozisyon Lasanble. Sa ki mon kapab dir, se ki nou ti'n tonm dakor ki *at least* i pa ti pou 5/2.

Donk ou, ou pe demann en lot, ou pe demann en mazorite *in fact* ki lo kote Lopozisyon. E sa nou bezwen, lo *FPAC*, wi. E sa i ava keksoz ki nou bezwen konsidere.

E nou ava sertennman fer li. Me plito nou ava fer li dan konteks swivan;- e mon krwar i enportan pou revwar, ou a permet mwan Mr Speaker. Pou nou regard en pti pe striktir nou Konstitisyon. E nou Konstitisyon in ganny konsevwar dan en fason ki

entelizan pou balans pouvwar dan pei. E nou ti war sa semenn pase ler nou ti pe koz lo, lefet ki Lasanble i bezwen aprouv Minis, en Prezidan ki'n ganny elekte.

Me sa balans ki egziste dan nou Konstitisyon set enn ki toultan nou bezwen rekonnet e met devan nou. E viv li e viv li *au quotidien* parey bann Franse i kontan dir.

Mon krwar apre 27an depi ki nou'n retourn koman en pei demokratik dan en rezim miltiparti, nou'n vwar lagrandisman nou demokrasi lannen apre lannen.

E sa in akselere parey nou tou nou rekonnet depi eleksyon 2005 ek 2006. E laprev se lafason ki sa tranzisyon in fer dan sa dernyen semenn. E mon krwar ki nou bezwen felisit nou lekor koman en Nasyon. Ki nou'n kapab anbras demokrasi e viv li dan en fason osi eksepsyonnel ki nou'n vwar.

E mon krwar ozordi, kontrerman a plizyer pei, enn ki pe annan eleksyon Prezidansyel ozordi menm, an mezir ki nou pe koze.

E enn ki fek ganny enn yer, kot Prezidan Ouattara *Côte d'Ivoire* in ganny elekte pou en trwazyenm fwa anba en Konstitisyon ki donn li zis 2 manda. Nou devret felisit nou

lekor koman en Nasyon. E nou'n vin en model pou lemonn, ki mannyer en demokrasi i devret ganny fer. E *FPAC* i annan son kontribisyon pou zwe dan sa rol *oversight* ki sa dezyenm rol, ki en Lasanble i bezwen fer.

E ler nou regard nou Konstitisyon, e sa set en keksoz kin fasin mwan toultan. Nou koz separasyon pouvwar koman sa filozofi ki *Montesquieu* ti elabore dan dizwityenm syek.

Me nou pa vwar separasyon pouvwar ditou dan nou Konstitisyon. Annefe napa separasyon pouvwar. Sa ki nou annan set en konsep bokou pli modern. Set en konsep balans pouvwar. E balans pouvwar i egziste dan zis en pti bout nou Konstitisyon. E sa i dan Lartik 49, dan definisyon en sosyete demokratik.

E definisyon sosyete demokratik i dir, e mon krwar sa i aplik pou nou, set en sosyete *pluralism* kot i pou annan latolerans, sipor pou drwa imen ek bann laliberte e *rule of law*.

E kot i annan en balans pouvwar ant L'Egzekitif, Lezislatif e Zidisyer. Nou'n kit a kote sa lespri separasyon pouvwar. Akoz nou realize ki separasyon pouvwar pa egziste.

I annan en *overlap* a tou moman ant sa 3 brans Gouvernman, kontan pa kontan. Me sa ki pli enportan se ki enn i kapab balans lot a tou moman.

E *FPAC* i enn sa bann zouti ki sa Lasanble i annan pou balans pouvwar L'Egzekitif. E i annan lezot, nou annan lezot zouti. Me sa set enn. E *FPAC* in ganny en gran popilarite, par lefe ki parmi tou bann Komite, li i travay an piblik.

Tou son bann deliberasyon, ou la mazorite son deliberasyon i lo televizyon e i antre dan lakour bann lezot dimoun. Sa se pa pou dir ki bann lezot Komite pa travay osi for.

Annefe bann, tou bann Komite i travay long erdtan. E mon profit sa lokazyon pou dir Mr Speaker avek bann dimoun deor ki demande, akoz ki bann Manm Lasanble, akoz ki nou fer Komite.

Annefe zot prop *PPB* ti kestyonn lakantite Komite ki nou fer dan sa Lasanble. E mwan mon'n war ki sa ti en kritik *unfair*. I ti en kritik *below the belt*.

Ki pa ti alaoter en parti politik pou fer. Me selman i ti dan en moman eleksyon. Alor

tou keksoz i ganny pardonnen dan letan eleksyon.

Me bann Komite Lasanble se bann keksoz, se bann Komite ki enportan pou travay nou Lasanble.

E bokou piblik pa realize e mon konnen ki zot pa realize ki kantite travay ki Komite i fer an deor sa 2 zour *Sitting* ki nou fer e ki dan domenn piblik. *FPAC* li in ganny sa popilarite akoz i fer son travay dan domenn piblik.

Me mon krwar mon bezwen, i mon devwar pou fer konpran dimoun deor. Ki bann Komite ki nou etabli isi dan Lasanble, se bann Komite ki itil pou travay Lasanble e ki zot travay dan gran parti ankor pli for ki sa 2 *sitting* Lasanble ki nou fer tou le semenn.

E bokou erdtan i ganny pase dan sa Komite. E alor si i annan en pti *allowance*, si sa *allowance* i vreman ptipti ki ganny peye a bann Manm Komite, pa repros nou, pa repros bann Manm ki ganny apwente lo sa bann Komite.

Akoz zot ganny en *stipend* pou travay an deor fonksyonnan Lasanble. Mr Speaker avek sa detrwa, avek sa detrwa parol, mon ti a kontan asir Onorab *Leader* Lopoziyon ki nou pou natirelman, parey nou

Konstitisyon i demann nou fer, aprouv Mosyon.

Pou ki sa Komite i ganny *set up*. E sa Komite lo nou kote ant la avek ler bann Manm in ganny anonse semenn prosenn. Nou ava pran konsiderasyon son rol e ki mannyer son konpozisyon i ganny etabli pou desarz sa rol dan meyer fason ki posib. Mersi Mr Speaker.

MR SPEAKER

Mersi Onorab. Onorab Terence Mondon.

HON TERENCE MONDON

Mersi Mr Speaker. Mr Speaker koman en Manm *FPAC* dan 7enm Lasanble, pou mwan kapab dir 2 mo lo sa Komite.

Wi, parey lezot in dir, nou'n fer en gran travay dan dernyen, dan 6enm Lasanble lo Komite *FPAC*. E mon oule ki mon mesaz i osi i ariv kot bann Minister departman osi.

Ou konnen, 6enm Lasanble nou'n ganny dir ki nou entimid bann zofisye Gouvernman. Mon krwar sa mesaz fodre zot ganny li byen, poudir nou pa vin entimid bann travayer Egzekitiv.

Me nou plito nou oule zot koz laverite. E zot travay dan en fason drwat. Nou vwar, nou'n vwar dan lepase bann

Lalwa Prokirman ki pa ganny respekte, zot pa onor.

E sa pou nou koman en Manm Komite, nou oule ki sa i sanze. Mon krwar sa 7enm Lasanble anba *Leadership Leader* Lopozisyon nou pou kontinyen. Nou pou kontinyen avek menm lanpler. E la mon pou dir ek Onorab Gill, ki pa neserman ki ou bezwen annan mazorite Manm Lopozisyon lo Komite pou fer sa travay.

Akoz lo sa Komite nou bann dimoun, kantmenm zot, zot ti dan Gouvernman, zot ti travay avek menm splander. Zot ti serye, fer sir ki zot rod, ki resours piblik i ganny zere byen. Pou mwan sa i pa'n neser. Akoz mon krwar mwan mon pou kontinyen travay avek menm lanpler. E pou fer sir ki nou resours i ganny byen zere. E mon met bokou lanfaz lo la Mr Speaker.

Akoz pou nou kapab deservi nou pep, i enportan ki nou zer byen nou resours. E nou get bokou depans Gouvernman. Be nou bezwen osi get reveni, lafason ki nou anmas reveni pou met dan kof Leta. Mon krwar nou pou bezwen met bokou lanfaz lo sa dan sa prosen Komite.

Onorab Andre in mansyonn FPAC. Apre bann

swivi. Parey in ganny dir, mon konnen nou Prezidan letan i ti pe diriz sa Komite, plen fwa in dir, nou pa ziz. Be selman mon santi petet osi i annan en fason kekfwa ki nou kapab annan en prosedir ki ler nou annan bann keksoz ki arive, ki nou vwar, ki i annan en prosedir ki kapab ganny, sa bann dimoun i kapab ganny *taken to task* baze lo bann lenvestigasyon ki nou fer.

Mr Speaker pou mwan en lot keksoz ki mon'n eksperyanse, ki mon'n war li ti bon ler nou fer sa bann travay, ler nou fer bann *public hearing*, nou'n vwar bann lezot Manm in vini in *attend*. Mon krwar Onorab Sandy Arissol in mansyonnen. E sa i ankouraz sa Komite osi dan sa travay.

Bann Manm i kapab vin asize, vin partisipe, kantmenm zot pa a partisip aktivman, me selman zot donn sa sipor ler nou fer sa travay. E mon krwar sa nou devret kontinyen ankouraze.

Petet sa i plizoumwen mon pwen ki mon anvil fer lo sa size. Petet ankor mon retourn lo Departman Gouvernman. Mon krwar, mon pran legzanp dan mon distrik Mr Speaker. Ou war kontrakter i ganny kontra pou fer en travay, zot pa onor zot kontra, zot *fail*. Ou war zot pe kontinyen ganny kontra. En

Takamaka in arive, mon deza aktyelman i annan.

E tou sa bann keksoz ki nou oule bann departman zot serye lo la ler nou, lo pou travay lo sa *FPAC*. Fer sir ki sa travay ki nou'n fer, sa nivo ki nou'n anmennen, nou pou move lo en lot nivo. E mon krwar *Leader* Lopozisyon i ava siport nou lo la, pou nou kapab fer en travay ankor lo en lot nivo dan sa prosen Komite.

Wi, bann larzan ki'n disparet nou pou kontinyen. Mon pou rode. Akoz i larzan pep Seselwa. I annan en rapor *COSPROH*, en rapor enterim. Ki enteresan, i annan en kantite keksoz ki'n sorti ladan. Sa osi nou ti a kontan ki *Leader* Lopozisyon koman *Chairman* sa Komite, i osi ava, nou a ganny sans diskite ki i pran li *on board* pou nou kapab rod tou laverite ki'n arive dan, ek sa bann lotel *COSPROH*. Avek sa Mr Speaker mon remersye ou pou donn mwan laparol. Mersi.

MR SPEAKER

Mersi Onorab. Wi Onorab Sebastien Pillay.

HON SEBASTIEN PILLAY

Mersi Mr Speaker. I koutim ki *mover* Mosyon i ganny en *Right of Reply*, swa

Leader dan Zafer Gouvernman, swa mwan menm.

MR SPEAKER

Sertennman Onorab, wi.

HON SEBASTIEN PILLAY

Mersi Mr Speaker. Mr Speaker mon krwar ki tou sa ki'n ganny dir vizavi *FPAC*, i bann keksoz ki tre ankourazan. I tre ankourazan akoz mon krwar, nou bezwen toultan annan en volonte pou nou kapab travay ansanm kolektivman koman en Lasanble. Sirtou an se ki konsern bann Komite. Dan en fason non partizan, pou rod larepons, pou rod bann, pou demann bann kestyon ki enportan. Ki Lepep Seselwa i anvi nou demande.

Me nou bezwen soulinyen ki *FPAC* pou *only as strong as* bann lenstitisyon ki siport li. Par egzanp Biro Oditer Zeneral i enn bann lenstitisyon ki siport *FPAC*. E son travay i osi i bezwen ganny anplifye, i bezwen ganny ranforsi, pou ki i kapab kontinyen donn sa sipor ki *FPAC* i bezwen.

Nou'n koz lo bann travay ki *FPAC* in fer dan 6enm Lasanble, ki'n posib atraver bann lezot lenstitisyon Gouvernman.

Par egzanp i annan *Public Enterprise Monitoring Commission* ki li i annan en rol enportan pou li zwe. Kot li i bezwen *monitor* bann diferan konpanyen piblik, bann *SOEs*, bann *State Own Enterprises*, bann parastatal.

E son rol se pou *provide* sa bann lenformasyon. E ki *FPAC* prezan i kapab pran sa bann lenformasyon, fer bann envestigasyon kot i annan envestigasyon.

Demann bann kestyon kot napa efikasite dan lafason ki finans pe ganny servi. E sa i pou enportan. Apre nou annan bann lenstitisyon parey, bann lenstitisyon parey *Anti-Corruption Commission*, ou konpran.

Zot osi zot pou annan en rol pou zot ranforsi sa ki *FPAC* pe fer. So Lasanble Nasyonal i pa egziste dan en *vacuum*. I egziste akote bann lezot lenstitisyon ki zot osi zot bezwen *as strong as* ki zot manda i demann zot pou zot kapab fer zot travay.

E dan ka *FPAC* nou pou *rely* lo sa bann lenstitisyon. Nou pou demann sa bann lenstitisyon pou zwe zot rol, pou form parti sa zefor ki nou oule anmennen. Pou asire ki toultan i annan rann kont i annan latransparans dan lafason ki

bann kont piblik i ganny servi. Zot konnen, mon krwar sa ki enportan pou nou Sesel, e mon krwar dan 6enm Lasanble nou'n toultan dir sa.

Se ki dan la mazorite pei, i apel sa Komite ki nou pe koz lo la, i apel en *Public Accounts Committee*. Me pou nou, nou apel li en *Finance and Public Accounts Committee*.

So i annan sa eleman Finans ki antre ladan. E sa eleman finans i osi enkorpor eleman reveni ki Gouvernman i gannyen, ki nou bezwen regarde. E tousala i bann keksoz ki nesaser pou nou kontinyen demann kestyon e pou nou kontinyen *investigate*.

Mr Speaker si nou get Konstitisyon, Lartik 94(3) Konstitisyon i fer ki menm ler nou pe desid lord ki bann Prozedlwa pe vin devan Lasanble, nou bezwen, *Leader* Lopozisyon i ganny konsilte. E mon krwar se sa ki montre ki sa Lofis *Leader* Lopozisyon. Rol en Lopozisyon dan en pei i enn ki pa zanmen devret ganny *usurp*.

Akoz i enn ki nesaser pou ki nou kapab kontinyen avans nou demokrasi. Mon zwenn mon bann koleg ki'n lo *FPAC* avan mwan, sirtou Onorab Mondon, e reasir li ki nou pou fer en travay parey nou ti fer dan 6enm Lasanble.

Kot nou pou fer li dan en fason non-partizan. E nou pou *maintain* en o standar pou asire ki *FPAC* dan 7enm Lasanble i osi *as effective*. Si non, pa pli efektiv, dan son travay ki i annan pou fer. E mon pou envit tou bann Manm kot i posib, pou vin form parti bann sesyon demann kestyon ki nou ava annan. Koumsa zot ava ganny en lide ki mannyer bann keksoz i pase.

E mon ti ava demann Sekretarya Lasanble Nasyonal, pou kontinyen donn nou sa sipor, pou asire ki bann sesyon travay ki *FPAC* i annan, i ava ganny met a laporte piblik. E ki piblik i ava vwar bann sesyon kestyon, bann diferan keksoz ki pe arive.

Anfen kont sa ki mon ti a kontan vwar, se ki koman en Lasanble e koman bann Komite pe enport si nou *Bills Committee*, pe enport si nou *FPAC*, pe enport si nou en lot Komite, ki nou kapab travay ansanm kolektivman. E zwe sa rol *oversight* koman Lasanble. Pou nou asire ki piblik i ganny *the better deal* toultan. E se sa kot mon *stand* e se sa kot mon pou asire ki tou bann Manm sa Komite pou kapab fer.

Alors mon demann Lasanble pou zwenn mwan, pou *welcome* sa nosyon ki nou

pe al ankor dan en lot letap, kot nou pou annan en Komite ki pou for, ki pou enportan. En Komite ki pou annan en travay signifikan pou fer. E mon swete ki bann Manm ki ganny swazir pou vin lo sa Komite, zot vin avek en lespri travay, avek en lespri non-partizan ler nou pou apros nou travay.

Akoz i pou neser pou nou kapab kolektivman ariv a la *fin* bann keksoz ki nou pou met devan nou koman nou bann vizyon e bann lobzektif koman en Komite. Mersi Mr Speaker.

MR SPEAKER

Mersi Onorab. Avek *Reply Leader* Lopozisyon, mon krwar nou kapab pas lo vot. Mon a relir Mosyon;- Anliny avek Lartik 104(1)(a) Konstitisyon ek *Standing Order* 88, Lasanble Nasyonal i etabli '*The Finance and Public Accounts Committee*. Nou a pas lo vot.

Tou bann ki pour lev lanmen silvouple? Mersi. *Finance and Public Accounts Committee* in ganny aprouve par Lasanble avek en vot inanim, 34 vot pour, 0 vot kont e 0 abstansyon.

Alor mon deklar Mosyon pase. Nou'n ariv lo trwazyenm la. E nou annan 8, mon pe propoze ki nou pran ankor 1 avan nou pran *break*. Alor nou

a pas lo katriyenm Mosyon e mon pas laparol Onorab Sandy Arissol.

HON SANDY ARISSOL

Mersi Mr Speaker. Bonzour ankor enn fwa tou dimoun ki a lekout. Mr Speaker nou katriyenm Mosyon lo *Order Paper* pou ozordi i lir *comme swivan*;-

In accordance with Standing Order 90(2)(a), this Assembly appoints a House Committee with Terms of Reference to be approved by the Assembly at a later date.

Mr Speaker mon *move* ki mon Mosyon i ganny segonde, *then* mon a dir en pti, en kontrandi lo la. Mersi.

MR SPEAKER

Wi, nou a pas lo segonnman. Onorab William, in lev lanmen anler.

HON WAVEN WILLIAM

Mr Speaker Mosyon in ganny segonde. Mersi.

MR SPEAKER

Mersi. Onorab Arissol ou ti a kontan adres sa Mosyon?

HON SANDY ARISSOL

Wi mon ti a kontan.

MR SPEAKER

Byensir.

HON SANDY ARISSOL

Yes Mr Speaker, mersi. Mon ti a kontan al kourt lo katriyenm Mosyon ki lo nou *Order Paper*. An prenon kont ki House *Committee* i en keksoz nouvo pou Lasanble. Parske avan nou ti annan en Komite ki ti apel *Reform and Modernization*. Ki ti ganny *Chair* par Speaker Lasanble. E mon asire poudir sa enn osi ki'n ranplas *Reform and Modernization* i pou ganny *Chair* par ou Mr Speaker e bann lezot Manm lo la.

Sa Komite avan li, ki mwan mon ti en Manm lo la, ti plizoumwen tous en pe, i ti *oversee* en pe lanvironnman Lasanble li menm.

Travay bann Komite Lasanble e *staff* an zeneral en pti pe lo la. E nou ti ganny sans zwenn ase regilyerman, pou nou balans en pe kwa ki nou santi i pou ed nou travay koman en Lasanble. Kwa ki pou ede avek bann lezot Komite pou fer ki zot travay i vin en pe pli *conducive* e fasil. Pou nou kapab delivre sa ki nou bezwen. E parey in ganny dir Mr Speaker, son *Terms of Reference* pou bezwen ganny aprouve par Lasanble Nasyonal, letan nou ava'n

travay lo la, an vi ki i konpletman en nouvo Komite.

E mon swete ki bann Manm ki ti deza lo Komite avan, e zot a kapab donn en pti kontrandi lo ki kalite travay ki nou ti fer an relasyon avek sa Komite.

E kwa ki nou pe ekspekte avek sa nouvo Komite ki'n ganny prezante ozordi, ki'n ganny apele *House Committee* dan nou 7enm Lasanble Nasyonal. Avek sa mon ti a *move* ki sa Mosyon i ganny aprouve Mr Speaker, oubyen okenn lezot Manm ti a kontan fer en pti deliberasyon lo la. Mersi bokou.

MR SPEAKER

Eski i annan okenn Manm ki ti a kontan adres Mosyon? Wi Onorab Adelaide.

HON FRANCOIS ADELAIDE

Mersi Mr Speaker. Bonzour tou dimoun. Parey Onorab Arissol in dir, mon osi mon ti en Manm lo sa *Reform and Modernization Committee*. So i annan en pe travay ki nou'n komans fer, ki nou ti'n komans fer. E ti komans aport fri. *Hopefully* ki dan sa *House Committee* tou sa bann rekomandasyon ki nou ti mete i ava ganny pran an kont. Pou ki

nou a kontinyen war nou Lasanble monte.

E enn mon rapel ki nou ti vremen pouse pou fer, se ki nou annan nou en liniformite dan fason sanze. E parey mon ti ganny problemm avek Onorab Gill ler mon ti dir sa. E mon krwar ozordi nou tou nou *happy* ki nou Lasanble pe vremen reprezante. E nou pe en lafyerte pou tou Seselwa. E mon dernyen pti pwen avan ler mon konklir, Mr Speaker, e sa pwen enportan.

En keksoz ki mon ti met lanfaz, pa mwan, nou ti mete, e mon pou kontinyen pouse pou ki Egzekitiv i tandé. Ki i enportan pou tou *MNA* elekte ouswa menm proporsyonnel, ki nou annan en lofis dan nou distrik.

Ki nou ava pre avek nou zabitan, nou ava konpran zot konsern, e nou ava adres zot konsern pou ki nou tou nou satisfé. So mon mesaz pou Egzekitiv ozordi se ki, mon pe lans ankor en lapel pou travay ganny fer o pli vit posib.

Pou tou *MNA* gannyen landrwa dan zot distrik pou zot pre avek zot zabitan. E avek sa 2 parol Mr Speaker, mon ava remersi ou. E mon pe demann tou dimoun pou siport sa Mosyon. Mersi.

MR SPEAKER

Mersi Onorab Adelaide. E lo ou dernyen pwen, mon'n met note pou mwan fer en demann avek Egzekitiv, pou zot konsider sa propo pou bann Manm Lasanble annan en biro dan distrik. Akoz sa ti en propozisyon ki'n deza ganny met devan par Egzekitiv. E mon ti a kontan ki nouvo Gouvernman i retourn lo la. Mersi, avek sa okenn lot Manm? Wi, Onorab Cosgrow.

HON WALLACE COSGROW

Mersi Mr Speaker, bonzour Mr Speaker, bonzour tou Manm Onorab. Mr Speaker mon pa pou fer en gran lentervansyon.

Me selman mon ti a kontan zis fer enn de pti remark. Konpare avek Onorab Adelaide mwan mon en nouvo Manm Lasanble. I annan bokou nouvo Manm isi, ki swa proporsyonnel ki swa elekte. Nou pa ofe avek sa laranzman ki ti la oparavan. Mon krwar i pa ti en *Standing Committee*, me selman i ti annan en laranzman avan.

I ti apel *Reform and Modernization Committee*. Me selman i pa ti dan sa laform. Mon pe war dan sa Mosyon e loter Mosyon pe demande ki

nou aprouve e *Terms of Reference* i ganny aprouve apre.

Mwan mon ti a sizere ki nou annan en *Terms of Reference*, nou konnen kwa ki nou pe antre ladan. *Once* nou konpran *the Terms of Reference of the Committee*, and then mon krwar bokou nou bann, mwan mon pe koz lo lapar bann Manm ki nouvo, bokou nou bann Manm nou a kapab konpran byen sa Komite.

E nou ava kapab donn nou sipor si i neserer. So mon lentervansyon i senp Mr Speaker. Mon krwar nou ti devret ganny sa *Terms of Reference* avan ki nou aprouv Komite. Mersi.

MR SPEAKER

Mersi Onorab. Mon a pas laparol avek Onorab William, apre avek *mover of the Motion*. Oubyen, wi pou adres pwen ki Onorab Cosgrow in leve. Onorab William.

HON WAVEN WILLIAM

Mersi Mr Speaker. Bonzour tou dimoun ki a lekout. Mr Speaker swivan deba ki'n pase lo sa Mosyon, lefe ki nou konnen ki ou menm ou ki pou vin *Chair* sa Komite. Mon ti a demande ki o pli vit posib ki nou'n fini aprouv Mosyon e bann nomen pou

reprezante lo sa Komite i ganny met devan.

Ki en miting i ganny fer o pli vit posib. Akoz i annan sa nesesite menm si i annan sa vye *Terms of Reference* pou nou kapab pas lo la e vwar ki fason ki nou pou bouz devan. E mon santi poudir avek sityasyon *COVID-19* ki pe afekte lemonn, e i pa'n eparnye Sesel, I pou enportan ki vremen nou pran konsiderasyon ki fason nou pou bouz devan. Avek sa 2 pti mo, mon ti a kontan remersi ou. E mon pou aport mon sipor pou sa Mosyon. Mersi.

MR SPEAKER

Mersi Onorab. Onorab Georges.

HON BERNARD GEORGES

Mersi Mr Speaker. Mr Speaker mon pa pou long. Mon ti anvi zis, Onorab *mover* Mosyon i ava eksplik avek Onorab Cosgrow akoz ki Mosyon pe prosed mannyer i pe prosede.

Me kekfwa mon pou donn en pe lenformasyon sa ki mon krwar i annan antet, se ki en *House Committee* li i la pou regard dan *welfare* bann Manm, *welfare staff* Lasanble.

Me osi fer okenn propozisyon pou amelyor striktir Lasanble li menm, son

premises, bann litalizasyon, bann lespas dan Lasanble.

Mon pe mazin nou *Documentation Center* par egzanp ki mannyer sa i kapab ganny servi en pe pli byen. Me mon pe spesifikman mazin *layout the Chamber* par egzanp.

Sa set en keksoz ki the *House Committee* en pe letan pe pas lo la. Me parey nou dir an Angle, in *kick the can down the road*, nou pa'n pran en desizyon.

Mon ava donn en legzanp, ki nou'n realize sertennman parey nou pou vwar dan letan Bidze, ki lafason ki nou *layout* i ete, i pa *the best layout* posib.

Latab devan kot bann Minis ek zot bann *advisors* i vini i en pe *tight*, annan de fwa. Chairman Lasanble ler Lasanble i dan Komite i reste dan sez Speaker.

Alor ki dan bann lezot Lasanble parey nou vwar, *Chair* i desann en *step* pli ba. E se pou sa rezon ki son *Mace* i bouz ansanm avek li.

Akoz son *Mace* toultan fodre i kote drwat avek li. Me nou pa kapab fer li la, nou napa en *table as such*. En latab kot i annan tou bann Lalwa Sesel. Akoz finalman se *that's our job*.

E kot ler i annan en pep ki ganny *laid, it's actually laid on the Table*. Tousala se bann

keksoz ki sa Komite pou *grapple* avek e pou anmenn devan Lasanble, pou lakseptasyon.

Alor dan sa 7enm Lasanble, mon pou ekonize ki i pou annan *subject obviously to* finans eksetera. E nou dan en move moman pou fer sa. Me a e serten moman mon mazin en sa se bann keksoz ki sa *House Committee* i ava *grapple* avek.

Non selman striktir, me osi *welfare*. Mon a donn en lot legzanp. Nou annan en *Members Lounge* ki si tou bann Manm i vin dan sa *Members Lounge*, i tro *tight*. Alors sa osi se bann keksoz ki pou *welfare* nou bann Manm. I en *Members Lounge* ki mon krwar son lespri se annan en landrwa kot bann Manm 2 kote, i kapab zwenn otour en tas kafe, otour en tas dite, en *snack*.

Me malerezman sa pa arive. Akoz prezan ler nou *break*, sakenn i tay dan son landrwa. I pa meyer fason pou ne Lasanble marse. Akoz nou reste touzour separe. Alor ki nou devret fors nou lekor pou vin en Lasanble, pa en Lasanble 2 parti politik. Me en Lasanble ki travay e ki *mix* ansanm.

Tousala se bann keksoz ki sa *House Committee* pou ganny demande pou fer. Mon dir sa pou bann nouvo Manm konpran, en pti pe lespri ki

6enm Lasanble ti anmennen ler zot ti, ler nou ti deside sanz *Reform and Modernization* pou vin *House Committee*. Ki pou anglob bokou plis keksoz ki zis reform ek modernizasyon. Mersi Mr Speaker.

MR SPEAKER

Mersi. Mon krwar Onorab Georges in donn en lesplikasyon ase kler lo konsep e bi sa Komite. E mon mazin bann Manm i a kapab konfortab pou konsider sa. Mon a pas *mover* Mosyon. Onorab Sandy Arissol.

HON SANDY ARISSOL

Mersi Mr Speaker. Mon kontan mo ki Onorab Georges in servi, se mo *welfare*. Ou konnen, mwan mon en pe, parfwa letan nou politisyen, nou bezwen veye ki kalite mo nou servi. Mwan mon pa'n oule servi sa mo letan, *welfare* letan mon'n entrodwir sa Mosyon. E sirtou sa i en nouvo Komite.

So letan ou pe entrodwir en nouvo Komite, e ou konmanse pou dir, poudir i pe get dan *welfare* bann Manm Lasanble avek *welfare staff*, deor i *sound* en pe diferan.

La zot etabli en nouvo Komite dan Lasanble ki pa ti la avan, zot in *cancel* enn, zot in refer en lot e li i pe get dan

welfare staff, savedir nou pe al rod en pe plis larzan pou *staff*, oubyen nou pe al get dan *welfare* Manm Lasanble.

Alor zot pe al vot en pe larzan an plis pou zot lekor. So mon'n evite servi sa mo *welfare*, be selman mon kontan manner Onorab Georges in eksplike. Mon krwar bann dimoun ki pe ekoute deor, zot konpran konsep aköz nou annan en *House* Komite e aköz sa mo *welfare* in ganny servi.

Dezyenman Mr Speaker, mon krwar lo pwen ki Onorab Adelaide in fer resorti an relasyon avek Egzekitiv pou ekoute, le bi sete, se pou sa rezon ki nou ti anvi ki sa Komite toultan i ganny *Chair* par *Speaker of the House*.

Se parske i ti annan sa lantant kot *Speaker* avek sa 2 *Leaders* i annan zot zour kot zot al *State House*, zot zwenn avek Egzekitiv.

E se pou sa rezon letan sa Komite, *House Committee* i ava zwenn an relasyon avek sa ki Onorab Georges in sey eksplik nou, pou li koman nou *Chair* anmenn sa bann konsern devan kot Egzekitiv.

E la mon kontan ou'n donn Onorab Adelaide en lasirans, pou dir wi, ou pou fer, ou pou anmenn sa konsern devan. E mon krwar sa le bi

annan *Chair* sa Komite Mr Speaker Lasanble Nasyonal.

Trwazyenm pwen i an referans avek sa ki Onorab Cosgrow in dir, aköz ou napa en *Terms of Reference* ozordi letan ki nou pe prezant Komite?

Mon krwar sa ki enportan se ki nou bezwen, Lasanble i bezwen pran en desizyon pou nou gannyen Komite. E sa Komite li apre zot ava zwenn ansanm pou zot travay lo zot *Terms of Reference*.

Pou zot kapab diskite, *then* zot ava anmenn kot Lasanble pou nou aprouve. Si napa en Komite, zanmen nou pou annan en *Terms of Reference* pou nou kapab desid lo en *Terms of Reference*.

Alor se pou sa rezon, nou, nou bezwen koman en Komite annan sa Komite, *then* nou ava asize ansanm koman en Komite pou nou kapab travay lo en keksoz, prezant avek *the House* pou nou vote wi oubyen non, si nou dakor. An relasyon avek sa Mr Speaker, mon ti a kontan remersye tou bann Manm ki'n entervenir lo nou pti Mosyon an relasyon avek *House Committee*, sa nouvo Komite.

Ki avan parey nou'n dir, ti apel *Reform and Modernization*. E nou swete ki i ava kontinyen fer en bon travay zis parey sa enn sortan. E ki pou ganny

Chair par Speaker of the House.
Mersi bokou.

MR SPEAKER

Mersi Onorab. E nou a pas lo vot. E mon relir Mosyon; *In accordance with Standing Order 90(2)(a), this Assembly appoints a House Committee with Terms of Reference to be approved by the Assembly at a later date.*

Tou bann ki vot pour lev lanmen silvouple? Mersi. Okenn kont? Mersi. *House Committee* in ganny aprouve par Lasanble avek 33 vot pour, 0 vot kont e 0 abstansyon. Alor mon deklare Mosyon in pase. Avek sa mon krwar mon a propoz en *adjournment*. E nou a retournen 11.15. Korek?

(BREAK)

MR SPEAKER

Mersi. Mosyon swivan i a ganny pran par Onorab Clifford Andre.

HON CLIFFORD ANDRE

Mersi Mr Speaker. Bonzour tou dimoun ankor, tou dimoun ki a lekout, tou Manm Onorab. Mr Speaker, Mosyon i lir koumsa;

In accordance with Standing Order 90(2)(c), this Assembly appoints a Defence

and Security Committee, to enjoy the Terms of Reference of the Committee as the same name in the Sixth Assembly. Mr Speaker mon *move* sa Mosyon apre mon ava dir enn de pti mo.

MR SPEAKER

Mersi. Mon a apel pou segonn sa Mosyon. Onorab Sandy Arissol.

HON SANDY ARISSOL

Mr Speaker mon ti a kontan segonn Mosyon anmennen par Onorab Andre. Mersi.

MR SPEAKER

Mersi. Onorab Andre, mon a pas ou laparol.

HON CLIFFORD ANDRE

Mersi Mr Speaker. Mr Speaker *Defence and Security Committee* i en Komite ki'n ganny etabli dan 6enm Lasanble Nasyonal Sesel. Ti annan sa nesesite pou etabli sa Komite.

Akoz letan nou ti vwar ti annan serten laspe ki konsern Ladefans, ki ti bezwen ganny analize e ganny pran an konsiderasyon par en pli pti group Lasanble.

Akoz serten sa bann laspe ti annan bann konotasyon konfidansyel. I vre ki letan i

annan latransparans, letan nou demann latransparans, *accountability*, rann kont. Nou dir ki tou keksoz i bezwen ganny fer ouvertman. Me letan i ariv kot i konsern sekirite ek la defans en pei, i annan serten laspe ki merit ganny en konsiderasyon ki annan en serten nivo konfidansyalite avek.

E sekirite ki i reste the *purview* en pti group dimoun. Me selman definitivman Bidze pou sa departman i bezwen ganny aprouve par Lasanble. So si in ganny *scrutinize* par sa pti group dimoun avek bann lotorite konsernen, i ganny pran ki sa konfidans i ganny mete dan sa group, dan sa Komite, i osi alaoter pou zot kapab desarz zot responsabilite.

Mr Speaker, *Defence and Security Committee* dan 6enm Lasanble i ti ganny loportinite pou li *interview* serten dimoun ki ozordi zot dan bann pozisyon kle.

E apre letan sa *interview* in ganny fer, rekomandasyon in ganny anvoye kot Prezidan, pou li fer serten lapwentman. So i montre ki manner in annan sa lantant ant Egzekitiv ek sa Komite, pou nou kapab vwar ki manner serten laspe

konfidansyalite defans avek sekirite pei i konsernen.

E mon kapab dir, ki nou ti vremen enpresyonnen. E santi nou privilezye ki Egzekitiv ti met sa konfidans dan nou, parey nou *Terms of Reference* ti demande. E nou'n desarz nou responsabilite parey nou *Terms of Reference* ti demande.

Mon ava osi demande ki avek nouvo ladministrasyon, Menm lantant i ganny donner avek sa Komite Ladefans, vi ki la nou annan nouvo Komandan-an-Sef.

Nou pou annan bann posibleman bann Bidze ki pou vini, kot nou pou vwar ki manner Ladefans pou fonksyonnen. Si i pou annan nouvo rol, si i pou annan diferan rol.

Kot nou ava kapab partisip dan sa bann aktivite ansanm avek Egzekitiv. Pou nou fer sir ki *accountability* osi ki Gouvernman i donn nou i alaoter.

An dot mo Mr Speaker, *FPAC* i zwe en rol pou gete ki manner Bidze Gouvernman i ganny depanse dan bann Minister. Komite Ladefans li osi i zwe en rol parey *FPAC*. Me selman *focus* lo *defence* avek *security*. I enportan pou note Mr Speaker ki non ki ganny

donnen e rol ki ganny definir i diferan dan diferan pei.

Par egzantp si nou pou get La Romani, i apel *Committee for Defence Public Order and National Security*. E li i *encompass* Minister Ladefans, Minister Zafer Enteryer.

Zot annan *Gendarmerie* laba, *Border Guards, Intelligence Services, Department with Intelligence Activity*. So i annan en pti pe *broad*.

Sesel osi nou bezwen et onnet, nou'n zve sa rol dan Departman Lentelizans. So i montre ki poudir nou fonksyon i enn ki vreman, vreman enportan.

E bann Manm ki lo la, i pa neserman ki zot annan konesans dan Ladefans. Me i pou osi en landrwa kot zot pou aprann serten laspe ki vreman enportan.

Dan *Allemagne* i apel *Defence Committee* senpleman. E li osi i responsab pou Minister la Defans avek Larme. Bulgarie Mr Speaker i *Internal Security and Public Order Committee*, kot li i *encompass* Minister Zafer Enteryer, Lapolis, *Gendarmerie, Border Guards*.

Epi li i fer *Non-Military Intelligence Services*. So si nou pe get en pti pe partou dan lemonn. E osi kot nou isi Sesel

nou oule fer sa travay. E vi ki nou en pti pei, nou annan Lentelizans, nou annan Larme, nou annan Lapolis. E sa lotorite in servi nou pou nou partisip dan zot bann dimoun ki pou ganny apwente. Partisip dan bann Bidze ki ganny formile pou sa bann departman.

Alors avek sa detrwa mo Mr Speaker. Mon osi oule dir ki i en landrwa ki sansib. En Komite ki sansib. Me en Komite kot avek nouvo ladministrasyon mon sir nou pou travay osi dir ki bann lezot Komite tel ki *FPAC e Bills Committee*. Akoz i pou annan bokou devlopman ki pe pase avek nouvo ladministrasyon Gouvernman Sesel. Alors avek sa 2 pti mo Mr Speaker, mon ti a demann sipor sorti kot tou Manm pou nou etabli sa Komite. Mersi.

MR SPEAKER

Mersi Onorab. Onorab sandy Arissol.

HON SANDY ARISSOL

Mersi Mr Speaker. Mr Speaker koman sa Manm ki'n segonn Mosyon anmennen par Onorab Andre, mon krwar i enportan pou nou eksplik dimoun deor, poudir dan 6enm Lasanble ti napa en *Defence Committee* oparavan.

E *Defence Committee* ti ganny etabli atraver 6em Lasanble, isi. Mon rapel letan nou ti pe pas Bidze, e Bidze ti ete Bidze Defans. Ou konnen letan nou ti pe koz lo Bidze Defans an Lasanble Nasyonal, toultan nou ti ganny dir poudir lo sa kote ki nou pe demande i sansib. Lo sa kote nou pa kapab dir.

Alor ti annan en, nou kapab dir en lagreman oubyen en rezolisyon dan Lasanble Nasyonal ki en Komite i ganny etabli zisteman pou Defans. Pou ki okenn pti keksoz sansib bann detay ki nou pa kapab donn lo medya isi dan Lasanble Nasyonal pou tou dimoun ekoute, alor nou fer li atraver sa Komite.

E la kot sa Komite ti'n ne. E sa ti ganny *Chair par Leader* Lopoziyon, sa letan ozordi Prezidan.

Pou zot kapab senpleman rod sa bann detay, rod tou sa bann pti keksoz sansib ki Onorab Andre in koz lo la. Pou ki zot Bidze i ganny aprouve. Be mwan mon ti ganny sans asiste sa Komite letan Onorab *Leader* Lopoziyon, Prezidan ozordi, Onorab Ramkalawan sa letan dan Lasanble Nasyonal, ti sorti dan sa Komite pou lezot komitman ki i ti annan.

Mwan mon ti ganny sans asiste sa Komite. E ou ti santi vre ti annan serten keksoz an relasyon avek Komite Defans ki ou pa kapab senpleman pe diskrit oubyen pe devwal tou lenformasyon an piblik.

I annan serten size sansib an relasyon avek zot travay, an relasyon avek sonm, nonm ki zot bezwen an relasyon pou fer sa travay. E se la kot Komite Defans ti ganny etabli. E mon krwar sa Komite i bezwen kontinyen, parske i enportan. Parske Defans sa bann letan sete zot ki ti pe pran plizoumwon pli gro songo Bidze ti pe ale.

Alor ti enportan pou nou demann en pe kestyon pou asire poudir i annan latransparans kot larzan pe ale. I enportan nou konnen lekel ki pe pran, lekel ki pe ganny fer avek, lekel ki pe *manage* sa. Se la kot sa Komite ti ganny etabli. E tou bann Manm ki ti lo la ti ganny sans demann zot kestyon, ekersi zot dout. E tou keksoz ti reste balanse. E apre sa ti ganny prezante dan rapor parey tou lezot Komite i fer.

E mon krwar pou sa Komite Defans i ava enportan pou nou annan bann dimoun kle ankor lo la. Senpleman pou nou kontiny sa travay ki 6em Lasanble in fer. Pou asire tou

sa ki nou'n diskite dan lefase, oubyen tou sa ki nou pe swete i arive, sirtou an relasyon avek Bidze an sa ki konsern Defans i ava dan tout transparans.

Kot tou lede kote latab nou ava pe *oversee*. Nou pe asire ki sa ki nou pe tonm dakor lo la i pe reprezant lamas e dimoun ki nou reprezante laba deor. Mon krwar Mosyon anmennen par Onorab Andre i fer sans. Nou bezwen en Komite Defans.

E pa oublie nou ava annan bann lezot pti detay ankor fir a mezir ki nou ale, pou nou kapab konnen e pou nou kapab diskite an sa ki konsern defans an relasyon avek nou pti pei Sesel.

Avek sa detrwa mo Mr Speaker mon ti a kontan siport sa Mosyon anmennen par Onorab Andre e mon a demann lezot Manm osi pou fer parey. Oubyen si i annan lezot Manm ki ti a kontan donn en pti sipor ankor an dizan detrwa mo. Avek sa mon ava aret la. Mersi Mr Speaker.

MR SPEAKER

Mersi Onorab. Onorab Gervais Henrie.

HON GERVAIS HENRIE

Mersi Mr Speaker. Konsernan sa Komite Ladefans,

mon ava dir ki, mon krwar i enn bann Komite ki nou pou bezwen donn li tou sipor nesaser. E mon ava eksplik bann rezon akoz. Premyerman i enn bann Komite pli nouvo ki nou pou pe aprouve ozordi, an term legzistans son letan ki in egziste.

Alor i fer ki i dan staz en pe anfanten li. Zot ankor pe mars katpat mon krwar. E i nesaser alor ki nou donn zot tou sa sipor. E ler mon pe koz sipor, *training* par egzanp. I enportan ki enn fwa ki sa zafer *COVID* in ale, lemonn in retourn dan son normal, normal, in sorti dan sa nouvo. Nou tap laport.

Sirtou dan group *Commonwealth* kot in annan bann lezot Parlman ki'n annan sa kalite Komite. Ki mannyer zot kapab ed nou bann Manm pou konnen kwa vremen ki zot merit pe fer e aziste zot *Terms of Reference* selon standar ou tandans modern?

Nou konnen poudir sa Komite i bezwen egzamin depans. Ladministrasyon mon krwar zot bezwen regard lo la. E *Policy* osi. E sirtou lefe ki nou annan en nouvo ladministrasyon. Mon pe demann bann Manm ki sorti lo nou kote latab sirtou pou zot travay dan en fason ki zot donn

koudmen brans Egzekitiv. Vreman pou kapab annan best *Policies* letan nou pe koze.

E zot bezwen osi egzamin serten topik spesifik ki zot ava swazir. Par egzamp sa dosye Assomption. Zis mon pe mazin *at the top of my head* la. Poudir i enn bann keksoz ouswa ekspansyon *Cost Guard*.

Kot zot kapab prezan fer bann rapor e soumet bann propozisyon konkret avek brans Egzekitiv. E enn bann keksoz ki zot bezwen port atansyon, i nou'n ariv a la *fin* en lepok sanzman Gouvernman apre 43an. En Gouvernman ki ti vin o pouvwar atraver koudeta kot in annan lenplikasyon militer. I fer ki tou sa letan in annan en konportman ouswa en fason panse ki'n ganny enstitisyonnalize. E ki dezormen nou bezwen sanze. Larme nou bezwen fer li, Ladefans, sekirite, i pou pei, I pa en group kot en group, ouswa en group pe protez en group. Me i pe protez Sesel avek tou Seselwa. E zot sa Komite la, zot pou bezwen enplike dan sa zafer.

Parski ler ou pe sey anmenn reform, sirtou bann reform demokratik, i pou tante annan sa bann konfli ant bann dimoun ki dir, "Be la ki zot

krwar konmsi zot pe vin met lord? Nou abitye fer koumsa, nou pa dakor avek sa ki ou pe propoze."

Me i bann keksoz. Larealite ki nou pou bezwen fer fas avek. E enn bann keksoz ki'n fer ki sa Komite in vin an egzistans, sa mo sekre, pangar devwal tou keksoz an piblik, sansib.

Prezan *ok*, nou'n kapab lager ki Lasanble Nasyonal in ganny en Komite. Me selman mwan mon *still* krwar poudir sosyete sivil i annan en rol kelkonk pou zot osi zet en koudey lo sa bann zafer ki pe arive dan nou Sekter Ladefans ek Sekirite. E alor Komite mon pe demann zot bann ki pou vin lo la, ki mannyer zot kapab angaze avek sosyete sivil pou asire ki tou dimoun i enplike. Prenon kont tou sa bann zafer sansibilite, sekre e tou sa.

Be selman i annan en landrwa ki mwan mon konvenki poudir zot kapab *zwen* *half way* avek sosyete sivil. Pou asire ki nou Sekter Ladefans e Sekirite pei an zeneral i pe deservi Sesel avek Seselwa dan tout lonnekte, tout profesyonnalizm, avek etik.

Parski repitasyon, i ankor annan move repitasyon dan sa sekter, kot zot *spy* lo nou, zot kapab bat ou, zot kapab.

Konmsi ki mannyer prezan, nou pe al de lavan la, nou bezwen met sa bann zafer par deryer nou, de lavan. Pou asire ki Ladefans ek Sekirite pei koman en sekter vreman i nou larzan ki nou pe met dan sa bann sekter pou zot travay, pou zot deservi pei. Me ki zot fer li dan tout lonnekte, profesyonnalizm avek etik, pou Sesel e pou tou Seselwa. Mersi Mr Speaker.

MR SPEAKER

Mersi Onorab. Onorab
Sebastien Pillay.

HON SEBASTIEN PILLAY

Mersi Mr Speaker. Mr Speaker dan 6em Lasanble ler nou ti debat pou nou annan sa Komite, enn bann rezon ti vin, ki ti vin evidan, sete ki i ti pe difisil pou kapab fer en *oversight* lo Lafors Defans, an se ki konsern sekirite pei, an se ki konsern zot travay. Akoz bokou eleman, bann diskisyon ki zot ti pe fer, ti annan bann serten eleman sansib. Ki ti kapab konpromet son, en loperasyon ki zot pe fer, ouswa lezot travay ki zot antisipe fer.

E bann profesyonnel, bann militer ti eksplik nou, poudir nou bezwen konpran, koumsa ki bann Lafors Defans i *operate* otour lemonn. E i

annan rezon, akoz zot annan en lapros *comme* tel ki zot pran.

E nou ti bezwen form sa Komite. E nou ti form sa Komite lo sa baz. Pou nou kapab antre, penetre en pti sa *veil of secrecy so to speak*. Pou nou kapab gannyen pe plis lenformasyon. E i enportan a sa moman pou nou *remind* Lepep Seselwa, bann par egzanp ki'n swiv sermantasyon bann Minis yer, ki i annan en *Oath of Secrecy* ki bann Minis i pran. E pou en solda oubyen en militer i pran menm *Oath*. I pran menm langazman.

Me, e parfwa pou en solda i bokou i pli grav. Akoz si i kas sa langazman i kapab ganny *Court Marshal*. E se sa ki nou ti ganny eksplike par bann militer. Me apre kreasyon sa Komite nou'n osi vwar ki travay ki Lafors Defans i fer e travay ki sa Komite i kapab fer vizavi Lafors Defans, pou vin en travay, pa zis pou regard kwa ki pe fer a en moman oubyen ler i vin rod son Bidze, me pou osi regard son bann plan ki i annan pou protez nou pei. Rezon mon dir sa, se akoz Lasanble i devret konsernen ki avek sa letan ki nou pe pas ladan, sa difikilte ekonomik ki nou pe pas ladan, enn nou bann resours pli enportan i nou annan, se nou resours Maritim.

E bokou fwa nou'n tande, oubyen nou menm nou atraver rezo sosyal, nou'n vwar plizyer *video* kot i annan bann lapès ilegal ki pe fer, i annan bann aktivite ilegal. E i pou enportan ki sa Komite i pez lo la. I enportan ki nou ganny nou komans ganny klerman ki rol ki pe ganny zwe, ki travay ki pe ganny fer pou protez nou bann byen ekonomik. Nou resours ekonomik, nou Lor Ble parey bokou dimoun i kapab apel li. Pou asire ki nou annan en Lor Ble si nou kontinyen eksperyans difikilte dan en sekter, kot sa lot sekter pe rebran, i ava annan pou nou kapab ale, pou rode, pou nou anmennen pou vann.

Pou nou kapab ganny resours pou ki nou pei i kapab kontinyen, nou lekonomi i kapab kontinyen fonksyonnen. So sa i pou enportan.

Me en lot pwen ki fondamantal e ki mon ti a kontan ki tou Manm Lasanble la anndan i pran konsyans. E nou aktivman regard ki mannyer nou kapab konekte ek travay sa Komite, set osi an se ki konsern proteksyon nou bann *borders* kont bann trafik, trafik drog, bann trafik ilegal ki kapab arive.

Fodre pa bliye, pa zis trafik drog ki arive. Me i osi

annan *transshipment* of dimoun, trafik imen ki pase. Tousala i bann keksoz ki nou koman en Komite Lasanble, nou pou bezwen fer sir poudir nou kit en lizye lo la.

Pou asire ki resours ki ganny mete i al ver *tackle* sa bann problem. E mon krwar ti ava nesese ki ler travay sa Komite i ganny fer, malgre ki bann rapor pou bezwen ganny redakte.

Savedir serten porsyon bann rapor pa pou kapab ganny pase o gran piblik. Me i ava annan lenformasyon, oubyen bann Manm Lasanble atraver zot Manm ki lo sa Komite, i a kapab pas zot bann konsern ki zot bann *constituents* pe dir zot.

E sa bann Manm prezan i a met sa devan ban lotorite konsernen, pou ki zot pran sa an konsiderasyon pou met dan zot bann plan, dan zot bann Polisi, pou ede protez nou pei. E mon krwar sa Komite, dot an plis ki i en Komite ki ase resan. Me i en Komite ki son prominans pou vin atraver lakantite travay ki i annan, dan sa sityasyon ki nou annan. E se sa ki pou fer nou war son lenportans.

E mon swet tou Manm ki vin lo sa Komite, bonn sans, i en travay entans ankor, en Komite entans. En Komite ki

pou demann letan. E ki ler nou al lo sa Komite parey nou'n dir, nou pran en lapros ki nou fer li dan en fason non partizan. Pou ki nou vreman kapab asire ki sa Komite i donn sa ki meyer. Pa zis pou Lepep Seselwa. Me i donn sa ki meyer pou ki Lasanble i kapab a lafen dizour ansanm i kapab abouti dan fer son travay ki neserer pou li fer. Sa se *oversight* e *scrutiny* lo travay Gouvernman. Mersi Mr Speaker.

MR SPEAKER

Mersi Onorab. Onorab Andre ou ti a kontan adres okenn pwen avan nou pas lo vot.

HON CLIFFORD ANDRE

Yes Mr Speaker. Mon krwar i *duty* ki *calls* ki nou *wrap-up, sum-up* avan nou pran en vot. Mon ti a kontan remersye tou bann Manm ki'n koz lo sa Mosyon. I vre ki parey in ganny dir e parey mon osi mon ti dir, ki sa Komite i pou en Komite ki vreman bezwen annan konfidansyalite *at the core of* son legzistans.

Me selman, menm si nou'n dir ki poudir i en nouvo Komite, me travay ki in fer i gran. Nou'n fer en kantite travay dan dernyen Lasanble, anba gidans prezan Prezidan Larepublik, Prezidan

Ramkalawan. I enportan osi pou nou note, en keksoz ki mon'n omite koz lo la. I letan kreasyon Komite ti ganny fer, e avan sa ti annan Konsey Ladefans.

I osi enportan pou rode ki manner Komite Lasanble i kapab fer en reprezantasyon lo Konsey Ladefans. Pou kapab annan sa *insight* of ki manner keksoz pe marse.

E kwa ki pe marse an term son Bidze. Akoz Konsey Ladefans i vwar Bidze, i vwar devlopman ki manner i pe fer konsernan Lafors Defans.

I osi enportan pou note ki nou pou bezwen annan en plas prominan dan serten laspe Lapolis definitivman anba nouvo gidans. Prenan sa an kont Mr Speaker, mon ti a kontan ankor enn fwa, letan bann nouvo Manm oubyen lafason ki nou repartasyon bann *membership*.

Bann ki vin lo la i pran sa latas koman enn ki vreman, vreman serye. Akoz i konsern sekirite nou pei, sekirite nou menm e pou nou bann lezot koleg. Avek sa detrwa mo Mr Speaker, mon ti a kontan ankor enn fwa remersye tou bann ki'n koze. E demann tou Manm Lasanble pou vot an faver sa Mosyon. Mersi.

MR SPEAKER

Mersi Onorab. Nou a pas lo vot. Tou bann ki vot pour lev lanmen silvouple? Mersi. Madanm Clerk in fini note ki tou vot, tou Manm in vot pour.

Alor Mosyon pou apwentman *Defence and Security Committee* in ganny aprouve avek 34 vot pour, 0 vot kont e 0 abstansyon. Alor Mosyon in pase. Nou a prosed lo swivan. E Mosyon pou ganny propoze par Onorab Waven William. Onorab.

HON WAVEN WILLIAM

Mersi Mr Speaker. Mr Speaker mon annan loner pou prezant sa Mosyon. An lakordans avek Lartik 90(2)(d) nou *Standing Order*, sa Lasanble i apwent en Komite Zafer Etranzer ki pou rezouir referans travay sa menm Komite 6enm Lasanble.

Mr Speaker lo sa Mosyon mon ti a kontan met devan ki dan 6enm Lasanble nou ti annan en referans travay. Latas sa Komite son responsabilite sete pou travay pros ek Minister Zafer etranzer e Tourizm. Lezot Lazans Gouvernman e non-gouvernmental lo size zafer etranze. Lapey Sekirite Ladefans i kontribye pwennvi kan e ler i nesaser.

Dezyenmman sete pou mentenir relasyon ant an egzistan e kree bann nouvo ek lezot Parlman e lorganizasyon enternasyonal, kot i konsern lentere Nasyonal e Parlman Sesel.

Trwazyenmman se pou fer lezot travay ki Lasanble Nasyonal, i kapab donn sa Komite pou fer.

Mr Speaker mon ti a kontan a sa pwen felisit tou bann Manm Komite Zafer Etranzer 6enm Lasanble. E i ti remarkab ki sa Komite in osi fer en travay ekselan, gide par ansyen *Chairman* ki konmela Minis Dezinyen Ferrari. E nou'n akonplir bokou.

E mon esper avek bokou latansyon, son demars pou annan en re negosyasyon lo Lakor Lapes Sesel avek Linyon Eropeen. Mr Speaker avek sa 2 pti pwen, mon pou aret la. Akoz mon pou ganny sans dan *wrapping-up* dir enn de mo ankor. Mersi.

MR SPEAKER

Mersi. Nou a pas lo segonde. Onorab Clifford Andre.

HON CLIFFORD ANDRE

Mersi Mr Speaker. Mon segonn sa Mosyon. Mon ti a kontan dir enn 2 pti mo si i posib.

MR SPEAKER

Mersi. Wi, be mon a pas laparol Onorab John Hoareau premye.

HON JOHN HOAREAU

Mersi Mr Speaker. Bonzour Mr Speaker, bonzour tou dimoun. Mon oule pou mon profit sa lokazyon pou mon dir 2 pti mo pou zistifye sa tel Komite dan Lasanble Nasyonal.

Premyerman sa Komite i zwe en rol *oversight* lo bann Protokol e bann Konvansyon, bann Lagreman, ki Sesel i sinyen, dan domenn bilateral e multilateral avek bann lezot pei ou bann groupman. Lo sa baz mon pe dir ki i enportan ki sa bann tel Lagreman, i pas anba en serten *scrutiny*, en serten *oversight*.

Pou ki pei i kontinyen devlope e i benefisyen avek sa bann Lagreman ki nou sinyen avek bann lezot omolog. Parey in ganny dir dan domenn lapas, nou ti kapab zwe en pli gran rol pou kontribye pou anmenn en pli bon Lakor Lapas, si nou ti'n kapab *secure* en plas koman obzervater dan negosyasyon sa bann Lagreman.

Me malerezman i pa'n le ka. Me nou'n ganny promet avek sa nouvo Gouvernman ki nou pou *part or en parcel of* sa group ki pou kapab ede, pou

negosye serten Lagreman dan lefitir.

Oubyen annan serten pli bon *oversight* lo serten Lagreman dan lefitir. Ankor sa Komite in zwe en rol pou promouvwar relasyon enternasyonal. E sa ti demontre par en vizit ki nou ti fer *Maurice 2an* pase. Kot nou ti promouvwar en pti pe bann proze rezyonal. En pe lo la kiltir osi.

E nou ti annan plizyer proze ki nou ti'n met devan avek avek *L'Association des parlementaires de la Commission de L'océan Indien*, en groupman ki ti pe komans, si ou oule ti pe komanse dan la rezyon. Me selman avek problem finansman ki pa'n ganny ase pou kapab met li lo son 2 lipye.

Me la i se moman kot nou pou kapab petet reouver sa dosye e refer viv sa lasosyasyon. Ki ava anmenn bokou plis dan domenn kiltirel, dan domenn lezot proze ki annan pou fer avek bann zil de Losean Endyen.

Mr Speaker i osi evidan ki en tel Komite nou'n annan 2 Manm aktiv ki'n partisip lo nivo *ACP-EU*. Konmela i apel *OACPS. Organization pour L'Afrique, Caraïbes, Pacific States*. Kot zot in partisipe dan

bann *high level political forum*. Kot nou apel bann *Joint Parliamentary Forum* aletranze.

Pou fer sir ki Sesel koman en pti pei ensiler, nou bann spesifisite nou zil avek nou vilnerabilite, i ganny pran kont dan okenn bann desizyon, ki pe ganny fer lo kote *trade and commerce* ki annan pou fer avek Linyon Eropéen, avek bann pti pei. Oubyen bann pei Lafrik, bann pei *Caräbes e Pacific*. E sa i anliny avek bann *post-Cotonou Agreement* ki'n ganny fer.

Pou fer kont osi en Komite parey en *International Affairs Committee* i osi *partnership* avek *Trade and Commerce Division* dan Minister Finans ek *Trade and Commerce*.

E la nou ansanm, nou regard bann plizyer bann Lagreman ki annan pou fer avek *Trade and Commerce*. E osi bann lezot keksoz ki annan pou fer avek ki mannyer Sesel i kapab benefisye, pli byen atraver *Trade and Commerce*. Nou osi form parti si ou oule, en *subgroup* oubyen en *part of the solution*, nou apel li toultan avek *Foreign Affairs*.

E la mon pe dir *part of solution*, aköz nou la, pa koman en lobstak, me koman en groupman ki pe esey donn en koudmen avek *Foreign Affairs*,

pou rod solisyon pou enn de bann sityasyon ki zot in vwar zot ladan.

Par egzanp nou ti mazin byen ler ti annan sa problemn kot apepre en 20tenn bann *staff Foreign Affairs* ti demisyonnen. E la nou'n zwe en rol enportan pou sey rod serten lazisteman, serten, koman kapab dir, kontrandi, serten rapor ki nou'n fer e rekomandasyon ki nou'n fer avek Gouvernman dizour.

Alor Sesel koman en pti pei, pou fini mon oule dir sa. Sesel koman en pti pei, fodre pa ki nou reste an izolasyon. En Komite plito, en Komite *Foreign Affairs*, i ede pou fer sir ki nou toultan reste lo map lemonn. E nou relasyon enternasyonal i benefisye nou pei. E nou toultan fer sir ki osi ki nou pep i vwar li o sant okenn devlopman enternasyonal oubyen lokal, ki nou pran par ladan. Mersi.

MR SPEAKER

Mersi Onorab. Onorab Egbert Aglae.

HON EGBERT AGLAE

Mersi Mr Speaker. Mr Speaker nou pe debat lo en Mosyon pou en Komite, ki annan gran lenportans pou Lasanble e osi pou pei an

zeneral. Sesel koman en Pti Leta Zil i plizoumwèn depandan kot i konsèrn an tèrm nou bann konsòmasyon resòrs. Bokou nou bann konsòmasyon i lye avèk entènasyonal e lenpòrtasyon. E i fer ki nou bezwen bokou nou bann pei, parey tou kou nou nonmen, pei zanmi. Kot nou bezwen annan bann Korperasyon avèk zot.

Parey nou annan bann Korperasyon Ekonomik. Kot bokou bann Lagreman i ganny sinyen. Bokou bann diskisyon, menm lo nivo *SADC*, lo nivo Lafrik, lo nivo Lerop li menm li. E sa i fer ki i anmèn bann benefis kot nou lavwa li menm li i ganny tandè lo en lasenn entènasyonal, malgre nou en pti pyon lo en map.

E Komite *IAC* li menm li, i ankadre en pe bann Lagreman, bann diskisyon ki nou bann Dirizan. Akoz toulezan i annan bann *SOME* ki nou bann dirizan i al partisip ladan. E bokou ladan i bann desizyon, bann rezolisyon i ganny pran.

E ler i ganny pran ou bezwen anmèn li lo nivo lokalite pou ou kapab *at least domesticate* li pou fer, ki ou osi ou azour avèk sa bann rezolisyon ki ganny met devan.

E pou sa arive ou bezwen annan bann konsiltasyon nesèser lo nivo lokal osi, pou

met anliny avèk sa bann lagreman ki ganny fer. E Lasanble i enn landrwa kot bann Lagreman, bann rezolisyon i vin devan pou ganny ratifye.

Menm si parfwa pa tou ki nou an lakor avèk. Me legzisans ler ou form partisen serten lorganizasyon, ou bezwen *at least* montre poudir ou senser ler ou'n diskrit en keksoz, ki ou bezwen onore.

E menm si parfwa i annan serten bann kontradiksyon dan en san ski pa aplikab pou nou pti pei, nou'n vwar dan lepase. Kot in annan bann Konvansyon ki nou'n form par ladan. Me i pa *suit* nou lokalite li menm li. Me selman a en pwèn nou'n onor serten langazman, menm si nou pa kapab dan son lenplimantasyon *domesticate* li dan son 100poursan parey sa bann Konvansyon, ouswa sa bann Trete ki nou sinyen.

E Mr Speaker i osi enpòrtan sa bann kalite relasyon. Akoz i pa zis dan domèn lekonomi, kot i annan sa *IAC* i kapab zwe son rol ladan. I annan bann laspe parey medikal osi, nou annan bann laspe edikasyonnel, laspe sport, kiltir.

Tousala i apòrt bann kontribisyon ki bann pei ki nou annan bann relasyon Bilateral,

Miltilateral avek, ouswa bann *body* ki nou afilye nou lekor avek enternasyonalman, dan en fason demokratik. I anmenn bann diferan louvertir pou pei.

E bokou Seselwa in benefisyè avek diferan kalite louvertir, atraver bann Korperasyon ki nou'n annan enternasyonal ek bann pei deor, parey nou pe dir.

E sa i pa'n kit Sesel deryer. E Sesel i ganny rekonnèt partou lo sa bann *body*. Mon kapab dir, ki nou pe fer byen e nou kontribisyon i marse. I montre poudir nou sistenm ki ti an mars ki i an plas pe fonksyonnen. E petet dan en fason ou en lot i devret annan serten anbelir.

Lo lot kote mon ti a kontan tous sa pwen kot i konsèrn Minister *Foreign Affairs* li menm, ki enportan. Ki la avek Gouvernman dizour i enportan pou asize etabli en diskisyon serye ant *IAC*. Pou vwar bann mankman ki i annan. Nou annan dosye ki ankor pe dormi mon kapab dir, ouswa ki'n ganny *shelved*, ki pa pe aktiv.

E ki a en pwen ouswa en moman donnen, ler i annan en keksoz ki zis soudennman i deklare, ki nou bezwen taye al rod en dosye, ale anmenn devan.

Ouswa in pas 5an, 10an ki'n ganny sinyen, me selman pa ankor ganny ratifye, rektifye pou vin devan Lasanble. So i enportan pou al rod en pe, fouy en pe dan sa bann dokiman ki nou Sesel nou'n diskite atraver nou bann *Leaders*, ler zot in al lo bann *forum*. Pou vwar kwa ki nou pa'n fer.

Sa ki pa tonm dan nou konteks relevans ozordi, mon konpran nou pa pou kapab ale, fors lo pep Seselwa. Me selman si nou santi poudir i pou annan serten benefis ki pa pou anmenn nou an kontrayete avek okenn bann lezot Protokol, ouswa Konvansyon ki egziste, nou bezwen met li lo latab diskite. Nou'n vwar sa osi en pe parey en legzanp mon pou donnen, sityasyon *IMO* avek Lotorite Por. Kot nou ti war nou dan en dilenm, nou ti pe ganny *blacklist* dan en sans. Akoz serten ratifikasyon pa ti ankor vin fer. Serten dokiman pa ti ankor ganny soumet, pa ankor ganny akredite.

So i enportan pou nou vwar sa bann dokiman ki ankor la, pou donn li son *life*, donn li son *breath* pou li kapab vin vivan. E ki Sesel li i ava bezwen reste azour e ki nou pa bezwen pe tay deryer Konvansyon, tay deryer Ratifikasyon, kan ki zis

serten keksoz i zis leve soudennman.

So avek sa Mr Speaker, mon krwar poudir sa Komite son travay i bezwen kontinyen. E mon respe pou bann ki ti lo sa Komite pou 6enm Lasanble, ki travay ki zot in fer. E nou ava donn sipor pou kontinyen. Mersi.

MR SPEAKER

Mersi Onorab. Onorab Georges.

HON BERNARD GEORGES

Mersi Mr Speaker. Mr Speaker *very briefly*. Mon ti anvi zis dir 2 pti keksoz. Premyerman sa Komite IAC ki pe al ganny formen, nou ti'n dir dan 6enm Lasanble, nou ti'n demande pou ki zot revwar en pti pe zot *Terms of Reference*.

Pou ki prezan sak fwa ki i annan en lenstriman enternasyonal, en Trete oubyen en lot *Agreement* oubyen *Protocol or whatever*, ki pou vin devan sa Lasanble, e ki ganny prezante dan sa Lasanble par *Leader of Government Business*, avan ki sa i arive, Minister ansarz sa Trete i pran kontak avek IAC, i diskrit sa Trete avek IAC.

En pti pe parey bann *Bills* i ganny fer. E *International Affairs Committee* prezan i

prepar en rapor pou ed bann Manm konpran en pe sa Trete, olye zis donn en lekspeze e dil avek *on the floor of the House*. E mon krwar sa i tre itil. Akoz ofir amezir ki nou ratifye bann Konvansyon Enternasyonal, IAC i kapab *lead the House* e donn nou en semen lo kisisa ki nou devret pe fer, kisisa ki nou devret pe regarde e kisisa ki benefis sa pou anmenn keksoz.

Dezyenm keksoz mon ti ava kontan mansyonnen bomaten, pou bann Manm, bann nouvo Manm sirtou, se ki IAC sa ki nou ti a kapab apel en *Departmental Committee*, oubyen en *Ministerial Committee*. Dan bokou Lasanble i annan en Komite Lasanble ki fer *oversight* lo en Minister Gouvernman.

E i annan en Komite Lasanble pou sak Minister Gouvernman. Donk ou ava annan en Komite lo Lasante, oubyen en Komite lo Ledikasyon, ki i ava *scrutinize* travay ki sa Minister dan Egzekitiv i fer.

Isi nou'n deside ki nou Lasanble i tro ptipti. E nou pa bezwen en *Departmental* oubyen en *Ministerial Committee* pou sak Minister. Me nou annan deza 3. FPAC i regard Finans.

Defence i regard natirelman Defans. E IAC i regard Zafer Enternasyonal. Kekfwa avek letan nou ava annan plis sa bann *Departmental Committees*. Me pou lenstan mon ti anvi zis sitye sa IAC dan sa konteks *Departmental Committee*. Mersi Mr Speaker.

MR SPEAKER

Mersi. Onorab Gill.

HON CHURCHILL GILL

Mersi Mr Speaker. Mon kontribisyon se, vi ki IAC parey Onorab ki'n koz avan mwan in dir, i annan nesese pou revwar zot *Terms of Reference*, mon ti a swete ki osi etal travay pou vwar bann Trete, Lagreman ki nou'n sinyen. Ki *attract* en *fees* toulezan, nou bezwen pey serten sonm.

E pou vwar, asize avek Minister Zafer Etranze, pou vwar lekel ki ankor relevan ozordi. E lekel parmi ki Sesel koman en pei a pe benefisye avek.

Parey ti *intended* ler nou ti sinyen. E sa i ava ede pou nou annan en levanter Lagreman ki vreman pei pe benefisye avek. Sa ki nou santi nepli relevan nou pa benefisye nou kapab retire. E sa i ava ede pou nou aret pey bann *fee*, pou bann

Lagreman ki pa pe anmenn nou okenn benefis apre ki nou'n sinyen. Mersi.

MR SPEAKER

Mersi Onorab. Mon a pas laparol avek *mover* Mosyon, Onorab William, pou rezimen.

HON WAVEN WILLIAM

Mersi Mr Speaker. Mr Speaker pou rezimen mon ti ava kontan dir ki mon siport tou sa bann lentervansyon ki'n ganny met devan.

E mon a dir ki wi dan sityasyon kot nou ladan ozordi, nouvo lanvironnman *COVID*, i nesese ki nou revwar nou nouvo latas ki nou pe al pran koman sa Komite. E mon azoute osi ki wi, i annan sa nesese pour priyoritiz bann Lagreman e bann Trete ki nou'n sinyen pou vwar lekel ki vreman relevan, akoz dan sa nouvo konteks ozordi i annan ki ou kapab dir in *obsolete* pou nou koman en pti pei.

Mr Speaker mon pou dakor avek Onorab Hoareau ki nou bezwen vwar vreman klerman, dan ki direksyon koman en Lasanble nou anvi pous louvraz sa Komite Zafer Etranzer. Mr Speaker nou'n siny en *Aide Memoire* avek Departman Zafer Etranzer. E mon a dir ki dan lepase i domaz

ki sa departman i ti enn pti pe retisan pou donn bann lenformasyon. E mon swete ki avek sa nouvo Gouvernman, nouvo Minister Zafer Etranzer keksoz i ava amelyore. E wi, i pou neser ki i annan en enklizyon IAC dan bann demars eksteryer, ki pei i fer.

E mon dakor avek Onorab Hoareau, ki nou anvi vin parti solisyon e nou pa oule ganny vwar koman bann baryer teknik. Mr Speaker mon osi anvi azoute ki letan IAC i zwenn, nou'n osi siny en *Aide Memoire* avek Lasanble Lazenés, kot nou enkli zot dan serten partisipasyon o nivo enternasyonal. E mon swete ki nouvo Komite i mentenir sa menm langazman avek Lasanble Lazenés.

Mr Speaker mon anvi azoute osi ki dan sa moman COVID, i pou enportan ki *the House Committee* i vwar ki fason, menm si nou pa kapab prezan fizikman deor, kot nou kapab ganny akse avek lekipman, pou nou kapab fer *virtual conference*. Akoz ozordi la IPU pe zwenn e menm ACP pe zwenn e nou pe mank bokou keksoz. An menm tan pou kapab fer nou lavwa tande lo lasenn enternasyonal koman en Parlman.

So, mon demann se ki sa travay i kapab ganny fer, e bann ler ganny revwar ki koman en Komite, sa partisipasyon avek sa *link* avek sa bann konferans, menm si nou pa prezan laba me lo *virtually* nou kapab fer li.

Mr Speaker an menm tan mon a dir ki dan 6em Lasanble ti annan en pe problem vizavi kordinasyon bann diferan groupman ki partisipan o nivo enternasyonal.

Par egzanp ou ti annan *Pan African Parliament*, ou ti annan *SADC PF*. Me ti annan en pe difikilte pou kapab senkroniz bann rapor e partisipasyon. Par egzanp si ou pe koz IPU ou konsider li koman en lorganizasyon miltilateral, kot bann desizyon ki ganny pran o nivo *SADC PF* ouswa *Pan African Parliament*, i enportan koman en Komite IAC nou kapab armoniz bann lenformasyon ki letan sa bann partisipasyon i arive o nivo miltilateral ki Sesel koman Lasanble Nasyonal Sesel, nou pe annan en pozisyon komen.

E en lot keksoz ki mon ti ava swete i arive se ki, dan lavenir, akoz 6em Lasanble nou pa ti kapab ganny sa sans pou nou kapab ganny sa lenformasyon, kot bann desizyon ki ganny pran par

Sesel o nivo *United Nation* ki koman en Lasanble, *IAC* i osi i ganny sa bann lenformasyon. Akoz sa i pou enportan. I pou enportan pou nou, pou nou kapab koz menm langaz.

Mr Speaker avan ki mon terminen mon ti ava kontan ki ou *bear with me*, akoz mon pa anvi rat sa sans ozordi la, pour enn, remerci tou zabitan distrik Grand Anse Mahe ki'n vot pour *LDS* pou li kapab raport sa laviktwar o nivo Lasanble Nasyonal e Prezidansyel dan distrik Grand Anse Mahe.

Mr Speaker menm si zot in anvoy en Anbasader detrwa Anvoye Spesyal dan distrik pandan kanpanny,

(laughter)

HON WAVEN WILLIAM

Me zabitan distrik Grand Anse Mahe in *stand strong* avek *LDS* pou kapab ganny sa eleksyon!

(APPLAUSE)

HON WAVEN WILLIAM

Mr Speaker mon dezyenm pwen avan mon terminen se ki, mon a demann nouvo Minister Lanvironnman avek Lagrikiltir pou zot pran anmen, sa sityasyon ki'n devlope kot labatwar. E ki zot fer tou le mye posibil, pou kapab fer en fason ki

sa lakonpannyen i ganny peye zot larzan aryeraz, ki nou pa ganny sa bann problem ki'n devlope parey nou'n vwar lo medya.

E mon swete ki nouvo Minis letan in fini fer son travay dan Minister, i ava ganny en miting avek bann Lasosyasyon Fermye pou vremen konpran ki pe pase e ki bann fermye a santi zot en pti pe pli eze dan zot travay ki zot pe fer. Mersi.

MR SPEAKER

Mersi Onorab. Avek sa nou a pas lo vot e mon a relir Mosyon;

In accordance with Standing Order 90(2)(d) this Assembly appoints an International Affairs Committee to enjoy the Terms of Reference of the Committee of the same name in the Sixth Assembly.

Tou bann ki vot pour lev lanmen silvouple? *International Affairs Committee* Lasanble in ganny aprouve par 33 vot pour, 0 vot kont e 0 abstansyon. Avek sa mon deklar Mosyon pase.

Mon a demann lopinyon bann *Leaders* ki konsernen avek *welfare* zot Manm ki mannyer nou prosede. I reste nou 2 Mosyon. Eski zot pare pou kontinyen oubyen-? *Ok* nou a kontinyen, dabor mon ava apel swivan Mosyon. Onorab Regina Esparon.

HON REGINA ESPARON

Mersi Mr Speaker. Bonn apre midi tou dimoun.

In accordance with Standing Order 90(2)(f), this Assembly appoints a Women's Parliamentary Caucus to enjoy the Terms of Reference of the Committee of the same name in the Sixth Assembly. Mersi.

MR SPEAKER

Mersi Onorab. Eski Mosyon i ganny segonde? Onorab Rosie Bistoquet.

HON ROSIE BISTOQUET

Bonzour Mr Speaker. Bonzour tou Manm Lasanble. Bonzour tou bann ki pe a lekout. Mon segonn sa Mosyon silvouple. Mersi.

MR SPEAKER

Mersi. Onorab Esparon ou ti ava kontan adres Mosyon?

HON REGINA ESPARON

Mersi Mr Speaker. Mr Speaker *Order 90(2)(f)* lo *Standing Orders* sa lenstriman ki govern nou Lasanble i fer provizyon ki Lasanble o komansman sak sesyon i elekte en Komite pour bann Madanm.

Mr Speaker partisipasyon madanm. I reprezantasyon madanm lo bann lezot Komite i

enn ki osi nesaser, apard annan sa Komite Madanm. Enn ki ti ganny revwar lannen pase, pou li sorti koman en Komite e vin en *Caucus*.

E sa ti ganny fer dan lespri pou annan sa platform kot tou madanm i kapab partisipe olye annan zis 7 madanm ki fer parey lezot Komite. Me en *Caucus* i donn lavantaz kot tou madanm i form par e partisip aktivman. Sa *Caucus* i travay pre ek bann lorganizasyon ki promouvwar byennet bann madanm e osi zafer lafanmir.

I osi en *Caucus* ki travay pre ek Komite Lasante dan Lasanble lo bann proze, ki afekte lasante bann madanm. Sa Komite i osi adres e siport bann Lalwa, ki protez lentegrite lafanmir e bann madanm, bann size parey kanser, *HIV Aids*.

Caucus i osi travay pre ek bann Lorganizasyon Enternasyonal, ki pe pouse pour ki madanm i ganny plis reprezantasyon lo nivo politik e osi lo bann desizyon kle, lo bann pozisyon kle dan Gouvernman.

Caucus bann madanm i osi ganny reprezante lo *SADC PF* sirtou lo *RWPC* ki *Regional Women Parliamentary Caucus*. En lorganizasyon anba parasol *SADC*, ki pe travay pou egalite

bann madanm dan Rezyon Sid Lafrik.

Mr Speaker ozordi bokou lorganizasyon enternasyonal i met lanfaz lo partisipasyon e reprezantan bann madanm, a tou nivo. Lo kote *IPU - Inter-Parliamentary Union*. Lo kote *PAP* e lezot lorganizasyon. Zot azanda se ki par lannen 2030 reprezantasyon madanm, i devret ariv 50poursan vizavi bann zonn.

E mon krwar ki isi Sesel nou devret pe osi viz ver sa target 50poursan reprezantasyon. An dot mo Mr Speaker *Caucus* bann Madanm i reprezant bann lavwa bann madanm dan Lasanble, irespektiv ki parti ou sorti. E nou la pou asire ki *égalité des genre, Gender Equality Policy* i ganny enplimante dan tou bann desizyon ki ganny pran ou enplimante. Mr Speaker *I beg to move*.

MR SPEAKER

Mersi Onorab. Onorab Ghislain.

HON CHANTAL GHISLAIN

Bonzour tou dimoun. Bonzour Mr Speaker e tou bann Manm Lasanble Nasyonal e osi tou dimoun a lekout. Mon ti oule zis pran laparol lo sa Mosyon

koman 6enm Lasanble mwan ki ti *Chair Caucus* bann Madanm.

Mon ti ava zis profite pour felisit tou bann Manm sa 6enm Lasanble bann madanm ki ti form parti sa *Caucus and Vice-Chair* ti sa letan Mrs Esparon, mon dir zot tou mersi pour sa. *And* i en *Caucus* ki ti, menm si ti annan 7 nou, nou ti kapab fer en kantite louvraz. Par egzanp nou ti parey loter Mosyon in dir.

Nou ti nobou kapab re travay lo *Terms of Reference* sa nouvo *Caucus* ki mannyer pou fonksyonnen. *Aand* apre nou ti regroup tou bann madanm menm si ti annan 7 nou, pou le fitir ki si menm si i annan en kantite madanm ki annan, nou tou nou form parti dan sa *Caucus*.

Sa 7 madanm in fer en kantite keksoz dan sa bann letan, dan sa 4an ki nou'n la. Nou'n kapab fer en kantite bann aktivite osi, ki'n ganny pran e mon espere ki nou kontinyen avek sa bann aktivite osi, ki nou ti fer dan 6enm Lasanble.

Menm si lo konmansman Lasanble, ti annan bokou diskisyon letan pou form Komite, si ti pou annan 5 Manm si ti pou annan tou, ki fer poudir pou premye fwa en Mosyon ti pase san ki ti annan vot lo la.

And mon kontan ki dan sa 6enm Lasanble sa 7 madanm, in nobou kapab fer sa bann zafer disparet, sa bann tirayman, ki annan size ki annan pou fer avek madanm. Kot la nou pa bezwen swazir si i annan 3 lo en kote, 4 lo lot kote, pe enport lekel balans dan Lasanble ki pli for.

Me tou madanm i form parti sa *Caucus and* pou mwan i en keksoz ki byen, parske koman bann madanm nou bezwen solider antre nou, nou bezwen siport koz bann madanm, ensi ki bann zanfan ki napa en lavwa dan Lasanble.

Mon krwar sa enn *Caucus* osi avek bokou plis madanm mon krwar nou kapab fer bokou plis ankor ki nou ti fer dan 6enm Lasanble. Pou sa mon dir zot tou mersi, *and* ki nou *move* de lavan. Mersi Mr Speaker.

MR SPEAKER

Mersi Onorab. Onorab Lemiel.

HON SYLVANNE LEMIEL

Mersi Mr Speaker. Bonn apre midi tou dimoun. Mr speaker mwan komann en madanm ki'n form parti sa *Caucus* dan 6enm Lasanble, mon santi ki nou'n fer en ase bon travay koman en *Caucus* e mon santi osi ki i vremen enportan pou nou

annan en *Caucus* fanm dan Lasanble.

Akoz ler ou gete nou bann madanm, nou lavwa bann zanfan. Nou lavwa bann fanmir. E nou osi annan bokou keksoz ki nou kapab aporte pou fer en sanzman, dan lavi nou bann fanmir dan lavi nou bann zanfan ki la deor, ki pe pas dan serten difikilte.

Mon krwar si dan sa 7enm Lasanble nou tou bann madanm ki la i annan 8 nou, mon panse ki nou tou nou pou form parti *Caucus* sa bann madanm, e an menm tan petet avek lapiy bann msye letan ki nou pou anmenn bann size ki konsern pou tous lafanmir devan.

Mon krwar ki nou pou kapab fer en mervey dan sa 7enm Lasanble si vremen nou travay as a *Caucus*, nou met politik de kote e nou travay pou en bonn koz. Nou travay pou nou bann fanmir e parey dan nou bann *Terms of Reference* i dir nou, nou tou nou pou travay ver en sel bi *ok*? Se mwan mon zis *wish* nou nouvo *Caucus* Madanm, aköz nou annan zis sa koman en *Caucus* la dan nou Lasanble, nou napa en lot ki nou apel li *Caucus*.

So mon zis *wish* ki nou 8 madanm nou travay, nou travay dir lanmen dan lanmen

ansanm, pou nou kapab fer sir ki sa voyaz 7enm Lasanble bann madanm nou fer en diferans. Mersi Mr Speaker.

MR SPEAKER

Mersi Onorab. Onorab Rosie Bistoquet.

HON ROSIE BISTOQUET

Mersi Mr Speaker. Mon krwar mon pa pou reste byen si mon pa dir enn de pti parol konsernan sa *Caucus group*. Akoz mon krwar sa group i tre enportan, sirtou pou bann desizyon politik ki ganny pran. E sa i pa zis nivo Nasyonal i nivo enternasyonal. Akoz nou konnen parey tou bann lezot lorganizasyon enternasyonal parey *UN, SADC, WHO*, e zot osi pe pous pour egalite ant madanm ek zonm. E sirtou kot i konsern bann desizyon politik.

Isi Sesel nou'n remarke par egzantp *it is a man's world*. Mon dir sa akoz parey nou'n remarke, *well* dan tou lezot departman se ki laplipar zonm ki dan pozisyon *leadership*. Mazorite zonm i dan pozisyon *leadership* e lamazorite madanm i dan pozisyon *managers, managerial position*. Par egzantp bann *managers*, bann ki dan lofis eksetera.

Me selman parkont nou trouve poudir isi nou annan

a pepre 600 nesans tou le lannen, *I mean not 600*, me 1600 nesans tou le lannen, e nou konnen poudir ladan i annan en zonm, pou sak 1 fanm edmi. Savedir i montre nou poudir madanm i annan son pozisyon dan nou pei.

(laughter)

HON ROSIE BISTOQUET

Me selman ankor nou konnen par egzantp akoz petet nou ganny trete koumsa, set akoz nou'n trouve bann madanm *they are mothers* ouswa bann manman. Apre zot annan sa latitid *nurturers*. Nou'n *nurture* nou bann pti zanfan. Nou *nurture* nou bann baba. Par egzantp letan nou donn tete nou pti baba.

E an plis ki sa nou'n trouve par egzantp lo kote *manpower*, nou trouve laplipar bann madanm i dan bann *post* profesyonnel parey bann *nurse*, bann *teachers*. Mon krwar nou ganny kwense dan sa pti kote la ki dir, mon krwar sa bann pozisyon i pli ale avek bann madanm.

E menm si mon pou get ankor en pti pe plis ki sa, get en pe parey dan nou Lasanble isi ozordi, mon krwar Onorab Lemiel in fer sa byen kler, in dir

poudir i annan 8 madanm dan sa Lasanble. E sa petet i bann keksoz kiltir ouswa erediter ki nou'n anmennen, set akoz bann madanm pa'n ganny pouse avek bann zom, pou antre dan politik, pou nobou fer desizyon politik. E mon krwar sa i manke.

E alors mon ti pou demann tou bann madanm isi Sesel, pou nou siport nou. Annou siport nou kanmarad. Pa gete ki parti kouler politik nou ete, pa gete ki larelizyon nou ete, pa gete ki pozisyon nou ete. Annou pous nou kanmarad. Akoz i annan defwa tro souvan nou tande, ennler nou bann madanm nou kraz bann madanm, *whereas* bann msye i kontan pous en pti pe bann madanm. So annou aret kraz nou kanmarad.

E mon konnen ki sa *Caucus group, Parliamentary Women's, Parliamentary Caucus group* ,i promot osi bann egalite atraver bann Lalwa ki pou ganny anmennen, E sa osi i pour kapab anmenn bann regilasyon bann Polisi, ki pou enfliyans bann desizyon sirtou bann desizyon ki en pti pe sansib.

Akoz nou konnen i annan bann desizyon, bann program par egzanp, ki devret ganny met an plas ouswa met an plas, e

menm bann pratik ki en pe sansib, pou nou kapab promot nou endikater. Nou endikater Nasyonal. I pa zis lo kote Lezislatif, me selman i lo kote lasante, i lo kote sosyal, i lo kote ledikasyon e tou.

Espesyalman avek nou sa ki nou trouve la, avek en kantite nou bann zenn fiy in antre dan drog, e pa mal i annan ki ansent;- ler zot ganny zot baba e sirtou fodre nou trouve ler zot ganny zot baba nou apel sa bann *heroin babies*. E si nou kontinyen avek sa sityasyon nou pa promot nou bann madanm, nou popilasyon pou desann. Malgre ki nou annan en popilasyon ki pe vyeyi, an se moman nou konnen i plis madanm ki zom, nou pou napa bann manman, bann zenn profesyonnel ki pou kapab pran swen avek nou fanmir.

E sirtou kot i konsern ledikasyon, nou trouve nou bann endikater ledikasyon in desann, nou endikater lezot domenn in desann. E mon krwar sa osi pou afekte nou lekonomi. Alors mwan mon pou siport sa Mosyon ki'n anmennen par Onorab Esparon, pou nou kapab promot nou bann madanm sirtou pou anmenn bann pwen, bann sityasyon ouswa bann desizyon politik atraver sa

Women's Caucus group. Mersi
Mr Speaker.

MR SPEAKER

Mersi Onorab. Onorab
Samynadin.

HON KELLY SAMYNADIN

Bonzour tou mon bann koleg
Onorab. Bonzour Mr Speaker,
bonzour tou dimoun ki a
lekout. Pou mwan mon santi
mwan fyer koman pli zenn
madanm dan sa 7enm Lasanble
Nasyonal, pou mwan donn mon
langazman pou siport sa
Mosyon.

Akoz mon asire ki mon
lavwa osi byen ki lezot lavwa
bann madanm dan sa
Lasanble, i pou asire ki nou
bann zenn madanm deor nou,
anyway, nou bann zenn
madanm i fer fas avek en
kantite defi. E mon ti ava
kontan et sa enn ki pou kapab
kontribye pour donn bann nide,
lo ki mannyer nou pou fer fas
kont sa bann defi.

Aprè osi i ava en
loportinite pou mwan kapab
aprann avek bann pli ansyen,
avek bann ki ti deza la avan. E
vwala se tou ki mon ti annan
pou dir Mr Speaker. Mersi.

MR SPEAKER

Mersi Onorab. Onorab Audrey
Vidot.

HON AUDREY VIDOT

Mersi Mr Speaker. Mr Speaker
ozordi mon pou, avek fyerte
ankor enn fwa, siport Mosyon ki
relye avek fanm *Caucus*
Madanm pou nou Lasanble.

Mon annan enn bann
Manm ki'n form parti 6enm
Lasanble lo *Caucus* Madanm.
Sa ki mon kapab partaze se ki i
en leksperyans pou bann
nouvo. I pou en leksperyans
inoubliyab. I pou en sans kot
nou kapab partaz e siport nou
bann langazman pou siport
bann madanm, swa zenn
oubyen pli aze dan pei.

E en travay ki 6enm
Lasanble in fer bokou, bokou,
mon krwar nou'n parmi bann
ki'n *provide* en dokiman avek
bokou program aktivite, ant
langazman ki nou'n fer avek
bann diferan lotorite, pou asire
ki nou siport bann fanm dan pei
e osi byen bann zenn fiy.

E sa ki mon kontan ozordi
dan nou 7enm Lasanble nou
annan en melanz group laz,
bann fanm ki pe reprezant
bann distrik, ouswa menm lo
proporsyonnel.

Me lesansyel sa ki mon ti
a swete, ki nou 7enm Lasanble
i travay desito byen ki 6enm
pour ki nou met nou politik de
partizan de kote, e ki nou travay
ansanm dan lentere bann

fanm, bann zenn fiy Seselwa, i enportan.

E mon ti ava kontan montre mon lapresyasyon, ki dan 7enm Lasanble omwen nou lo parti Lopozisyon, ki nou'n montre nou pa'n vot kont okenn fanm Minis, propozisyon Minis ki'n vin devan nou Lasanble. Nou montre nou langazman ki *firm* lo nou desizyon, pou nou siport bann fanm, pe enport zot lopinyon ou diferans politik dan pei.

So mon swet bonnsans tou nou bann koleg dan nou parkour travay dan sa enn manda, pour ki nou a travay dir, avek lanmour, pou nou bann fanm ek bann zenn fiy zeneral. Mersi.

MR SPEAKER

Mersi Onorab. Onorab Esparon mon a pas ou laparol pou rezimen.

HON REGINA ESPARON

Mersi Mr Speaker. Mr Speaker mon lans en lapel avek nou Lasanble, pou otan ki posib akey bann madanm lo lezot Komite e pa les nou zis lo sa *Caucus* akoz i pour madanm.

(APPLAUSE)

HON REGINA ESPARON

Akoz mon konvenki, mon konnen mon konvenki ki bann madanm i annan en kantite pou ofer lo lezot Komite. Alor bann msye fer plas pou akey bann madanm lo lezot Komite. Menm si sa Mosyon i pou form *Caucus* bann Madanm mon demann bann msye osi pou vote pou nou kapab aprouv sa *Caucus* bann Madanm. Mersi Mr Speaker.

MR SPEAKER

Mersi Onorab. Mon a relir Mosyon pou nou vote;

In accordance with Standing Order 90(2)(f), this Assembly appoints a Women's Parliamentary Caucus to enjoy the Terms of Reference of the Committee of the same name in the Sixth Assembly.

Tou Manm ki vot pour? Lev lanmen silvouple, mersi. Komite *Women's Parliamentary Caucus* in ganny aprouve par Lasanble avek en vot inanim 34 vot pour, 0 vot kont, 0 abstansyon. Alor madanm *mover Motion* in ganny son dezir avek *approval* bann msye osi, mersi alor mon deklar sa Mosyon pase. Nou a pran nou dernyen Mosyon pou ozordi. E mon apel Onorab Sylvanne Lemiel.

HON SYLVANNE LEMIEL

Mersi Mr Speaker. Mosyon i lir koumsa Mr Speaker;

Sa Lasanble i demande ki en Komite Lasanble Nasyonal anba tit *Committee of Government Assurance* i ganny etabli, e ki son Term Referans ki deza egziste e ki'n anfans dan 6em Lasanble Nasyonal i ganny mentenir. Mersi.

MR SPEAKER

Mersi Onorab. Eski Mosyon a ganny segonde? Onorab Loizeau.

HON NORBERT LOIZEAU

Mersi Mr Speaker. Bonzour tou dimoun. Mr Speaker avek gran plezir mon oule segonn sa Mosyon anmennen par Onorab Lemiel. Mersi.

MR SPEAKER

Mersi. Onorab Lemiel ou ti ava kontan adres Mosyon?

HON SYLVANNE LEMIEL

Mersi Mr Speaker. Mr Speaker Komite Lasirans dan Lasanble li menm i en Komite ki tre trez enportan, e mwan menm letan mon get sa tel Komite, mon *rate* li en pti pe ekivalan avek *FPAC*. Menm si *FPAC* li son rol i dan Konstitisyon, me li anba *Standing Orders* 90(2)(e) i demande ki nou annan en tel Komite dan Lasanble.

Sa Komite son rol pou lenformasyon nou bann nouvo Manm osi, se nou tou nou konnen i annan bann lasirans ki bann Minis premyerman enn Prezidan, bann Minis, bann Sef Egzekitiv, bann *Chairman Board*, zot kapab vin fer dan nou Lasanble.

So i annan en kantite keksoz ki zot pou vin dir nou. E parey dan 6em Lasanble i annan en kantite keksoz ki ti vin ganny dir isi dan *Chamber*. Sa Komite nou louvraz nou, sete ki nou pas lo sa bann lasirans ki zot in vin donnen osi dan Lasanble, e nou fer sir ki Gouvernman li menm in akonplir sa bann lasirans.

Lasirans li menm i kapab *be it* an term proze osi, ki zot in donn en garanti isi dan sa Lasanble, pou dir ki zot pou fer. *Or* i kapab nenport ki lezot keksoz ki zot in vin dir nou, zot in vin donn nou en lasirans, en garanti ki pou (enplimant), ki pou enplik larzan Gouvernman, pou zot kapab akonpli sa bann serten lasirans avek, nou sa Komite ki fer sir ki nou fer sa follow up lo sa bann lasirans.

Dan 6em Lasanble sa Komite ti ganny *Chair* par Onorab Gervais Henrie, e ti annan 7 nou lo sa Komite, ki mon krwar *as* en tim, nou ti fer en bon travay. I annan travay ki

reste *outstanding* pou nou fer. Mon konnen nou'n fer detrwa vizit.

Nou'n al Praslin, nou'n al get bann proze li menm ki'n ganny fer par Gouvernman Lokal, proze 24/24/24 ki ti ganny fer La Digue par *MHILT*. Nou'n ale nou ti'n al regard sa.

E dan distrik li menm, nou'n pas kot bann diferan proze ki Gouvernman li menm ti vin donn nou lasirans isi dan sa Lasanble, ti vin dir nou ki ti pou fer e akonpli sa bann proze dan tel dele letan. Nou'n ale nou'n al swiv serten sa bann proze. Bokou sa bann proze li menm ti ganny akonpli e i annan bokou ki nou vwar i ankor *ongoing*.

Savedir i pou neserer ki nou, ki pou form parti *Government Assurance* dan sa 7em Lasanble, nou bezwen kontinyen pe fer en *follow-up* lo sa bann proze, e lo bann lasirans ki byento pou pe vin devan nou osi.

E parey mon'n redir, nou annan ankor bann lasirans ki dan 6em Lasanble nou'n kit deryer, e mon plis ki krwar ki nou pou kontinyen *follow-up* lo sa bann lasirans akoz bokou i ankor bann keksoz ki deza dan laliny pe ganny fer.

E ki Gouvernman ozordi, ki ler in vini mon panse zot pou

kontinyen pe travay lo la, e nou, nou rol se pou kontinyen fer *follow-up* pou vwar si sa bann proze *or* sa bann lasirans ki zot in vin zonn nou, isi lo *floor*, in ganny materyalize.

So Mr Speaker, mon a les lezot Manm dir sa ki zot ti annan pou dir lo sa Mosyon, e apre pou fini kont mon ava *wrap-up* pli tar. Mersi.

MR SPEAKER

Mersi Onorab. Annou gard bann entervansyon en pe bref. Akoz mon annan plizyer Manm ki'n lev lanmen. Onorab Clive Roucou.

HON CLIVE ROUCOU

Mersi Mr Speaker. Bonzour Mr Speaker. Bonzour tou koleg Onorab. Mr Speaker mon osi tou mon pou komans parey Onorab Lemiel an siportan sa Mosyon ki in anmenn devan nou pou etabli *Committee of Government Assurance*.

En Komite ki mon osi tou mon grad li lo en nivo vreman enportan. Lo en nivo parey *FPAC*, parey Onorab Lemiel in dir dan son entervansyon. E rezondet pou en tel Komite se pour *scrutinize* bann lasirans promes e bann *undertaking* ki bann Minis e bann lezot azan Gouvernman i anmenn devan nou Lasanble.

E nou fer sa parey dan 6enm Lasanble an kolaborasyon tre pros, avek sa bann azan e Minister spesifik. Nou osi aport nou komanter e kontribisyon lo bann lenplimantasyon, retar, efikasite e bann aksyon ki'n ganny fer pou dan lenplimantasyon okenn proze ki Gouvernman i anmennen.

E dan 6enm Lasanble mon ti form par Komite COGA parey nou apele anba *chairmanship* Onorab Henrie mon koman Vis-*Chairman* e lezot koleg Onorab. Nou ti annan Onorab Arissol, Onorab Loizeau, Onorab Lemiel, Onorab Simon Gill avek Onorab Wilbert Herminie, ki nou ti travay tre pros ek kanmarad.

E nou ti war ki fri nou travay ti aporte. E alor mon pe demann nou 7enm Lasanble ki ankor enn fwa tou Manm ki pou vin lo sa Komite, pou nou travay pros, e get bann proze ki Gouvernman dizour pou anmennen, pou asire ki tou keksoz i lo bon semen. Alors mon demann tou koleg Onorab pou siport sa Mosyon. Mersi.

MR SPEAKER

Mersi Onorab. Onorab Loizeau.

HON NORBERT LOIZEAU

Mersi Mr Speaker. Parey ou'n dir mon pou bref, mon pa pou repet sa ki lezot Manm in dir. Mwan mon pou al en pti pe dan an lot laliny.

Mr Speaker koman en Manm COGA, mon kontan mon'n segonn Mosyon e mon anvi dir ek Onorab Lemiel ki nou ti apresye son travay in en Manm ki'n toultan aktiv lo sa Komite. Me nou dan Lopozisyon ler nou ti antre dan 6enm Lasanble, en pe letan apre toultan dan nou *Caucus* nou ti koz lo COGA, pou vwar mannyer nou pou fer li vin en Komite, ki pou vin en pe menm nivo parey in dir avek FPAC.

E premye keksoz ki nou ti fer ler nou ti antre, anba gidans *Chairman* Onorab Deputy Speaker ozordi Onorab Henrie, nou ti apel *Chairman* COGA ki ti dan 5enm Lasanble, pou vwar ki travay zot ti pe fer.

E ler nou ti zenn li nou ti vwar ki 5enm Lasanble ti en Komite ti en Komite ki i ti la, ti annan Manm lo la ti pe ganny peye, me selman ti napa gran keksoz ki ti pe ganny fer. Selman a mon avi, mon konpran Mr Speaker aköz. Aköz zot ti annan 25/0 avek en *funded Opposition*, sa nou ti ekspekte ki napa gran travay ki ti pou fer. Me selman les sa de kote.

Be nou ler nou ti vini dan 6enm Lasanble nou ti demar vremen vit. E nou ti fer en bon pe travay parey Onorab Lemiel in dir, en keksoz ki i pa'n nonmen se ki nou ti annan bokou bann *Hearing*. En pe parey *FPAC*, nou ti annan en pe bann *public Hearing* kot nou ti demann kestyon.

E Onorab Lemiel ti en Manm aktiv menm lo la, nou ti demann kestyon. Nou ti zwenn avek bann departman diferan Minister, kot nou ti anmenn zot menm ti napa *camera* ki ti pe filmen, me selman nou ti ganny en konversasyon avek zot, pou nou kapab konnen ki pe arive lo tel keksoz ki zot in promet, ki zot *next step*.

Mr Speaker kantmenm nou pa ti en Komite ki dil ek Finans, en Minister ki nou ti zwenn pli souvan, se Minis Finans. Sa bann letan Minis Finans ti Mr Larose, ki ti kontan enterakte ek nou, akoz nou ti annan bokou keksoz ki nou ti anvii konnen avek Finans e li i ti dir nou.

E la Mr Speaker mwan vi ki nou dan Lopozisyon, ler nou ti dan Lopozisyon sa letan nou ti *Chair* sa Komite. Akoz i ti enportan pou nou dan Lopozisyon, pou nou kapab fer sa travay. E la mwan mon panse, mwan mon pou fer en

propozisyon, mon panse ki a se moman la vi ki *US* ki dan Lopozisyon, mwan mon panse ki *chairmanship* sa Komite, i al lo lot kote laba, pou zot kapab fer sa travay *oversight* en pe parey ki *Leader* Lopozisyon pou fer dan *FPAC*. Sa i enn mon propozisyon.

An terminan mon anvii dir ki tou bann Manm ki pe vin lo sa Komite, i enportan ki nou donn nou letan. Nou travay dir pour ki sa Komite i ava vin enn ki sorti byen. E mon anvii remersye Madanm Clerk ki'n en dimoun kle lo sa Komite. I ti nou sekreter. In fer en travay ekselan e mon panse ki Madanm Clerk, mon krwar ou pou kontinyen lo sa Komite. Mon panse.

Mr Speaker mersi pou sa 2 pti mo. E mon segonn sa Mosyon e mon apresye Onorab Lemiel in aksepte ki sa Komite in fer en travay vremen ekselan dan 6enm Lasanble. Mersi.

MR SPEAKER

Mersi Onorab. Onorab Sandy Arissol.

HON SANDY ARISSOL

Mersi Mr Speaker. Mon ava en pe bref parey ou'n demann mwan. Selman mon krwar sa ki enportan pou dir se ki Komite *COGA* in en Komite enteresan li.

In enteresan dan plizyer laspe, dan plizyer parkour ki nou'n fer ansanm.

Be selman mon ti ava kontan konmans avek sa pwen ki Onorab Loizeau in fini avek. Ou konnen dan tou bann Komite ki nou'n koz lo la, e la nou pe fini avek dernyen Komite lo *Order Paper* anmennen par Onorab Lemiel. Tou bann Komite Mr Speaker, e pou piblik ki pe ekoute deor, nou'n ganny sipor bann Manm Sekretarya.

I enportan pou dir parske lo sak Komite ki nou'n annan, sak Komite ki nou lo la se bann manm Sekretarya ki'n asiste nou dan tou sort fason pou asire ki nou Komite i bouze delavan.

Alor parey Onorab Loizeau in dir mon a profite koman Madanm Clerk ki la, li ki ti enn nou *staff* Sekretarya lo Komite, mon ti ava kontan dir zot mersi bokou pou sa sipor ki zot in donn 6enm Lasanble, an relasyon avek travay Komite ki nou'n fer.

E la mon pe swete ki sa lantant travay i reste egzaktman parey i ti ete dan 6enm Lasanble. E lot pwen ki mon krwar i enportan se, sa laspe ki Onorab Loizeau in koz lo la. Ozordi *US* i dan Lopozisyon e nou, nou dan

Gouvernman, i bezwen enn sa bann Komite parey nou'n dir *FPAC* kot, *chairmanship* sa Komite i bezwen ver *US*. Parske se zot ki pou *oversee* Gouvernman. Gouvernman pa kapab *oversee* son lekor alor lo sa laspe ki Onorab Loizeau in dir.

E mon krwar sa i toutafe normal, pou nou balanse pou dir poudir *COGA*, sa Komite, ki sipoze *oversee* tou bann promes ki bann Minis, Prezidan in fer dan nou Lasanble Nasyonal, pou asire ki sa Gouvernman ki la, Gouvernman dizour i a pe desarz son responsabilite, e i a pe fer en travay ekselan ki dimoun pe ekspekte de li.

Mr Speaker nou parkour in enteresan parske *COGA*, nou'n travay lasemenn, nou'n travay osi wikenn ki konpri Sanmdi ek Dimans. E mon rapel tre byen lo sa ki nou'n koz lo la, plizyer Manm in koz lo la. Mon a rapel letan nou ti pe al Praslin, pou nou al vizit bann proze La Digue avek Baie te Anne ek Grand Anse.

Mon rapel letan nou ti lo *Airport*, bann Seselwa ki ti vwar nou lo *Airport* bann travayer ti dir, "Get zot laba, la zot pe al donn en bal Praslin!" Se sa fason ki zot ti vwar nou, letan zot ti vwar en group *MNA* pe *check in* lo *Airport* Praslin zot dir

“Lala get zot pe al donn en bal Praslin!”

Nou bal Praslin ki nou ti pe al donner Mr Speaker sete senpleman, pou desarz sa responsabilite ki nou ti'n gannyen, koman Komite COGA pou nou al *oversee* en pe bann proze ki nou ti al vizite.

Sa sete La Digue, Baie Ste Anne ek Grand Anse e nou ti ganny sans enterakte osi avek bann travayer Gouvernman. P ar egzanp *Land Transport* bann DAs, nou ti ganny sans koz avek bann dimoun bann Zofisye pou lakaz an relasyon avek bann proze ki nou ti al vizite.

Mon krwar tou sa bann travay ki nou'n fer in aport fri parske parey in ganny dir i annan plizyer *Hearings* ki ti ganny fer. Sel Komite apart *FPAC* ki'n apel tou bann Minis dan Lasanble Nasyonal, an relasyon avek pou *summon* zot pou zot vini, donn nou en kontrandi lo zot travay ki zot pe fer sete COGA. E osi bann *PS* e sa ti ganny fer an kolaborasyon avek bann manm Sekretarya ki ti fer anndan dan nou pti, kot nou al pran nou goute 10er parey nou dir.

E ti en travay ekselan kot nou ti kapab e sanz parol, nou ti kapab e sanz lenformasyon, pour ki dimoun an deor i konnen ki i annan en travay ki

pe ganny fer par sa Komite ki apel COGA.

E mon krwar lo menm laliny Mr Speaker, mon ti ava kontan profite remersye tou bann Manm ki ti lo la, e mon swete ki tou lezot Manm ki ti ava enterese pou zwenn pou zot konpran en pe sa travay. E pou nou gete ki mannyer sa enn Gouvernman ki la, i bezwen delivre konpare avek sa enn avan.

Alor avek sa detrwa mo Mr Speaker, mwan osi mon pou aport mon sipor pou Komite COGA. E mon swete ki Komite COGA avek son nouvo *Chairman* ki ava la nou fer en travay ekselan, parey nou ti fer dan 6em Lasanble Nasyonal, san dout avek sipor bann Manm ki ava lo la. Mersi bokou Mr Speaker.

MR SPEAKER

Mersi Onorab. Onorab Henrie.

HON GERVAIS HENRIE

Mersi Mr Speaker. Mon pran laparol ozordi apre midi koman *former Chairperson* COGA. E mon krwar i kler lantant lo sa kote latab. Nou anvi ki *from this day forward* i vin en konvansyon dan nou Lasanble ki *Chairman* COGA i toultan lopolizyon ki gannyen, akoz pou la senp rezon son rol pou li

scrutinize bann promes, bann *undertaking*, bann lasirans ki Gouvernman dizour i donnen.

Ler nou pe dir nou oule etabli en Konvansyon, bomaten dan son prezantasyon Onorab Georges in koz lo bann lamannman konstitisyonnèl ki pe vini, ouswa lefet ki nou'n fek fer revizyon mazer lo *Standing Orders*, mwan i ti ava mon swe koman en Manm 7enm Lasanble, pou vwar ki dan Lartik 104, COGA i ganny azoute koman enn bann Komite permanan akote *FPAC* avek *Standing Orders*.

E alor menm dan nou *Standing Orders* Lartik 88(5) i osi presize, non 88(5) i pour spesifikman *FPAC*, me dan nou *Standing Orders* osi i mete ki i *customary* ki en Manm Lopozisyon ki ganny *Chairmanship* sa Komite. So sa i bann keksoz ki mon ti ava kontan, nou koman 7enm Lasanble nou kite letan nou pe ale.

Akoz i enportan ki nou reflesir e nou *lobby* pou sa bann kalite sanzman. Parski pou mwan mon anvi war nou demokrasi i evolye, kot dimoun dezormen, i swiv Gouvernman baze lo son bann promes ki i fer e ki zistans ki i delivre sa bann promes. Akoz non selman nou

konfye zot sa bann responsabilite atraver vot.

Me *tax payers* i investir dan Bidze Nasyonal, pour Gouvernman kapab servi li byen e fer sa bann promes. E alor ki si lafen manda zot in fer dimoun a *reward* zot, avek vot ankor e koumsa i ava *strengthen* nou demokrasi, kot i ava vin dan rezilta travay ki Gouvernman i fer. E non pa la kantite *cooker*, *fridge* avek televizyon ki ou donn elektora. Me baze lo konpetans ki ou delivre lo ou programm travay sirtou, sirtou ou manifesto.

Alor Mr Speaker enn bann defi ki sa Komite i annan, e ki mon mazine nou pou bezwen konsidere, tou bann *support staff* ki'n travay avek COGA, i bann dimoun ki tre o plase dan Sekretarya. Tradisyonnèlman in Clerk, Deputy Clerk avek Mrs Thelermont ki ansarz *Financial Controller* Lasanble.

Zot annan en kantite travay, e prezan avek volim travay COGA i kapab met nou dan serten difikilte. Donk sa i ava en diskisyon ki nou ava, en konversasyon ki nou ava kontinyen annan. Me an dizan sa, pou lenformasyon Lasanble mwan avek Madanm Clerk nou ti al vwar Anbasader Endyen sa lannen, ti sa lannen.

Be akoz nou ti al war li? Se ki *L'Inde* an 2018 zot ti *unveil*, sa ki zot apel en *online assurances monitoring system*, zot in vwar poudir la kantite dimoun i vin la i fer promes prezan pou swiv ek papye, i difisil. E bann lerer imen parfwa sa bann lasirans i disparet.

So zot in fer en sistenm *online* ki prezan sa i ganny *input* bann Minister i mete, ou kapab *check* son *timeline* si i pe ale, e nou'n demann li eski be Lasanble Nasyonal Sesel pa kapab ganny asiste avek sa? In dir nou fantastik, tan ki zot kapab ede;- nou konnen mannyer bann Endyen i ete. Donk i dir *yeah* nou ava ede, be selman zot bezwen ekrir fer tou bann zafer prosedir normal an ekrir.

E sa dosye ti deza dan lofis ou predeser, e malerezman apre bann zafer Lasanble in dizourd. Donk Mr Speaker mon pe fer pledwari ki nou *follow-up* sa dosye. E zis pour donn zot en legzanp par egzanp ki mannyer *L'inde* in kapab sa *online monitoring system* i telman efektiv. Zot in kapab desifre poudir 2007 zot ti annan zot 26, 830 lasirans ki'n ganny fer, ki'n ganny donnen.

E disi ziska 2018, 21, 439 ladan ti'n ganny delivre. Donk sa *online system this is how*

effective it is. E isi nou tande ennler.

Par egzanp letan Minis Finans i vini i dir baze lo *Appropriation Bill*, bann proze ki sa Minister i dir i pou fer, apre lafen lannen letan Bidze pres pou fini, i donn en poursantaz ki mannyer zot in *achieve*. E nou kapab zize lekel Minister ki pe pli delivre ki lot. So sa i enn bann size mon krwar ki ou devret swiv de pre.

E finalman nou'n vwar poudir dan bann pei kot i annan en Komite Lasirans, *L'inde, Uganda, Botswana* kot Komite in ganny sans dayer al fer en vizit lesanz travay e an menm tan aprann en pe avek zot. *Malawi* i annan.

Nou vwar poudir lasirans li i pa tonbe, akoz normalman bann Komite ler Lasanble i sanze, ou komans de nouvo. Bann *Bills* par egzanp i bezwen re gazete, be li bann lasirans zot dir ou non, *custom* i se ki i reste.

Akoz par egzanp si *PUC* in dir nou poudir, i pou fer en proze pas tiyo dan distrik Mont Buxton, e Lasanble i sanze, sa proze *i still* kontinyen li. Donk sa lasirans li sa Komite i bezwen kontinyen swiv. E zisteman sa largiman ki Onorab Lemiel in fer.

E mon apresye par egzanp, wi zisteman zafer tinel

eski pou fer, nou bezwen al gete dan sa zafer la. Donk vwala sa pwen ki mon ti anvi fer m Speaker. E mon ava koman ansyen *Chairman*, remersye tou bann Manm ki'n travay avek mwan. Mon krwar nou'n perdi zis 2 Manm se Onorab Wilbert Herminie avek Onorab Simon Gill.

Donk i annan en *institutional memory* tre for, ki pou reste pou COGA e mon swet tou bann Manm lo sa Komite lo 7enm Lasanble tou de bon dan travay ki zot pou fer pou sa Komite. Mersi.

MR SPEAKER

Mersi Onorab. Onorab Cosgrow.

HON WALLACE COSGROW

Mersi Mr Speaker. Mr Speaker mazorite keksoz ki mon ti'n *plan* pou mwan dir in fini ganny fer resorti par mazorite bann Manm ki'n koze. Zis mon ti ava kontan petet ranforsi lo 2 keksoz;- premyerman lo lenportans sa Komite. In ganny refer sorti ki sa Komite i osi enportan. E menm si pa *equally important* parey FPAC. Mon ti ava kontan ranforsi lo la, akoz sa i en Komite akoz par egzant sa dan mon letan Egzekitiv i en Komite ki souvandfwa ou'n war bann korespondans sorti kot

Lasanble, ki pe demann ou *status* lo tel lasirans, dan diferan Minister kot mon'n ale.

So i en Komite ki vreman enterakte avek Gouvernman. e i en Komite ki *really keep you on your toes*. E mon krwar si nou pe donn li sa, pa *status*, me sa lenportans en pti pe parey FPAC, mon pa konnen si petet propozisyon Onorab Gill taler an term reprezantasyon lo sa Komite, si petet ti kapab osi ganny vwar.

Vi ki Onorab Arissol osi in dir poudir, i ti ava kontan si sa *chairmanship* i vin kote ise e mon krwar lot Onorab osi mon krwar Onorab Loizeau osi in dir, i ti ava kontan si *chairmanship* i vin lo kote Lopozisyon. So petet osi si nou kapab revwar zis pou kapab kit sa obzektivite, e sa *oversight* en pe plis.

Dezyenm Mr Speaker mon ti ava kontan ranforsi lo sa zafer *oversight*. Mon krwar sa Komite i en Komite ki sa pli gro zouti ki Lasanble i annan pou fer sa rol parmi son bann 3 rol, sa rol *oversight*.

Nou kapab servi sa Komite pou nou fer sir ki Gouvernman i delivre. Pou fer sir ki tou bann promes i ganny fer devan Lasanble, bann promes ki ganny *achieve*. Nou realis, nou konnen pa tou keksoz parfwa ki

ariv dan en dele letan ki nou ti ava kontan i arive.

Me selman nou bezwen fer sir, ki letan nou fer en komitman ki sa komitman i ganny *carry on* ziska ler i ganny finalize.

So, Mr Speaker avek sa 2 pti mo mon pou siport sa Komite. E mon pou siporte ki *chairmanship* i vin lo nou kote. E si sa propozisyon an term reprezantasyon parey Onorab Gill in ganny fer taler i kapab osi ganny pran konsiderasyon evantyelman, ler nou pe fer nou bann travay. Mersi Mr Speaker.

MR SPEAKER

Mersi Onorab. Onorab Adelaide.

HON FRANCOIS ADELAIDE

Mersi Mr Speaker. Mr Speaker mon osi dan 6em Lasanble mon ti antas bokou lenportans avek sa Komite e akoz mon ti war zot annan en pouvwar ki zot kapab fer en bon pe keksoz.

Me petet mwan mon ti lot kote laplenn ki bann Manm lo Komite zot dir zot in travay ase byen. E mon pa pou dir non, be solman mwan mon pa'n resanti ki sa Komite in vreman met Gouvernman ki ti la avan, an kestyon.

Akoz souvandfwa mon'n trouv mwan bezwen lager sirtou

mon bann proze. Mon'n lager proze klinik mon pa konnen depi ler mon'n antre ziska ozordi pa ankor materyalize. Si sa Komite i pour formen, mon ti a kontan ki bann lasirans pa vin zis lo papye, me sa papye nou kontinyen sivre pour ki aksyon i ganny pran.

E la mon annan bokou konfidan dan Prezidan Ramkalawan, akoz in dir poudir nou pou bezwen retir politik dan louvraz, apre nou bezwen aret koup birokrasi. Akoz si ou gete Gouvernman ki ti la oparavan, zot in kasyet bokou lenformasyon. Apre i ti en Gouvernman ki ti napa plan zot pa'n kapab pran desizyon.

Bokou keksoz i vini zot in prezant ek nou, ler nou gete ti bann zoli program be apre solman ti napa kontinite. So esperon ki safwasi ler Minis i ava vini nou pa bezwen tay deryer li, me i ava konnen poudir sa i son devwar, in koz avek Lasanble Nasyonal i pour donner. Mon dakor nou pou annan en Komite ki pou fer sir ki pou bezwen sivre.

Me mwan mon panse ki nou tou nou bezwen azir avek tout lonnekte, pour ki tou a lafen dizour nou benefisye. Akoz mon pa pou kapab depi lannen komanse, lannen fini

nou pou zis demann kestyon me selman keksoz pa marse.

So mon ti ava vreman kontan ki bann dimoun bann Manm ki pou form parti lo sa Komite zot vreman fer sa louvraz aker, fer sir ki Gouvernman dizour i ganny kestyonnen.

E tou posibilite larepons ki nou gannyen, mon krwar nou bezwen fer sir nou met li an aksyon pour ki nou pep i benefisye o premye.

So vwala mon lapel avek zot, i pa vadir ki mon'n dir zot poudir mon pa satisfè avek zot travay vreman zot in fer. Mon konnen ti annan en Gouvernman ki ti en pe difisil, ki lenformasyon ti vreman, zot ti vreman ekonomiz bann parol avek bann sityasyon, ki'n fer en pe zot louvraz en pe difisil.

Me solman mon krwar poudir nou kapab fer bokou pli byen. E sirtou avek sa Gouvernman Lepep Seselwa nou dir, pa Gouvernman LDS sa Gouvernman kot Lepep Seselwa mon krwar i ava kapab delivre e nou tou nou a satisfè.

Mr Speaker zis avan mon pou fini, petet mon ti ava kontan demann *Leader* Lopozisyon pour, mon krwar Onorab Loze i en pe malad ozordi mon pa tann li ditou. Mersi.

(laughter)

MR SPEAKER

Mersi Onorab. Onorab Wavel Woodcock.

HON WAVEL WOODCOCK

Mersi Mr Speaker. Mosyon pou aport sipor pou sa Mosyon pour etabli sa Komite, akoz mon santi ki COGA i en Komite ki vreman enportan. Parey mon frer Onorab Adelaide in dir oparavan, dan 6em Lasanble nou'n fer fas avek bokou difikilte sirtou kot i konsern bann promes, bann lasirans ki bann diferan Minis in fer devan Lasanble Nasyonal.

Me en keksoz ki vreman enportan pour bann nouvo Manm sirtou konpran, se ki nou osi nou annan en rol pou nou zwen pou ed COGA. Ki mannyer nou fer sa? Akoz mon a plizyer repriz mon'n fer fas avek difikilte kot i konsern serten bann proze vreman enportan dan mon distrik.

E mon ki mon'n fer Mr Speaker, mon'n apros *Chairman* COGA sa letan, ki ti Onorab Deputy Speaker ozordi, Onorab Henrie, e mon'n met devan li bann lasirans ki serten bann Minister in fer devan Lasanble, ki zot pa'n *deliver* lo la.

E sa i en rol ki nou osi nou bezwen zwe koman sa nouvo Lasanble Nasyonal, pou nou apros COGA swa atraver *email*, swa atraver apros son *Chairman*, swa son *Vis-Chair*, pou nou met devan bann proze ki dan lentere nou distrik ki nou santi Gouvernman pa pe *deliver* lo la.

Avek sa Mr Speaker, mon bezwen dir ki mon'n vremen apresye travay ki COGA in fer dan 6em Lasanble Nasyonal, par lefe ki zot pa'n zis reste zis lo Mahe, zot in bouz en pe partou, zot in al La Digue, Praslin.

E mwan osi mon'n akonpanyi COGA dan zot bann vizit ki zot in fer, e sa ki ti enteresan se ki zot ti apros bann Manm dan plizyer bann distrik, e nou lo zil pros, nou ti ganny demande lekel bann proze ki bann diferan Minister in promet pour fer ki zot pa ankor fer?

E zisteman mon kapab mansyonn detrwa proze ki mon ti pe ganny difikilte avek dan mon distrik parey *daycare* Grand Anse Praslin, semen St Joseph. St Joseph *access* e semen Pasker/Laplenn Hollandaise, e lezot bann proze enportan ki COGA dan en fason ou en lot, in ede met en presyon lo Gouvernman, pou fer sir ki sa

bann proze swa i demare, swa sa bann proze in konplete ozordi.

Alor sa Komite i en Komite vremen enportan ki a laporte tou bann Manm ki pou zot servi, ki pou ed zot *deliver* lo nivo zot distrik. Mersi Mr Speaker.

MR SPEAKER

Mersi Onorab. Onorab Rosie Bistoquet.

HON ROSIE BISTOQUET

Mersi Mr Speaker. Letan mon pe regard, mon pou koz en pti pe *more or less* koman en piblik ouswa en aktivis dan Sesel, akoz lannen pase mon pa ti la dan sa Lasanble me mon *more or less* ekout sa ki'n pase lo televizyon, ape mon'n lir, apre mon'n swiv.

Mon krwar sa Komite i en Komite vremen enportan letan mon'n fer en pe literatir dan lezot pei par egzantp mon trouve *L'Inde* son premye rapor ti ganny raporte anba sa *Government Assurance*, son premye rapor ti ganny prodwi an 1972. *Whereas* nou isi nou premye Lasanble ti ganny ensistyalize an 1993.

Mon pa pou tro al tro long lo la, be selman pandan sa bann letan ki mon'n ekoute ki mon'n tande pandan sa bann

deba. Par egzanp par bann ki ti ganny fer letan zot ti vin dan Lasanble par bann responsab, par egzanp bann Minis, bann CEO, bann PS e lezot ankor, zot in toultan servi letan bann larepons ki zot in donnen, zot in toultan servi sa bann term swivan;

“Mon a get ladan.”

“Mon a konsidere.”

“Lenformasyon pou ganny kolekte.”

“Nou a rode apre nou ava fer ou konnen.” Swa,

“Nou ava anmenn larepons laprosenn fwa.”

“Nou a donn larepons ouswa lenformasyon atraver Lofis Speaker.”

E sa i bann keksoz ki konmsi mon krwar sa lannen, fodre avek sa nouvo COGA, i devret sanze! Parey nou Prezidan Wavel Ramkalawan in dir, “nou pa pou kapab travay koumsa, nou bezwen sanze pou nou piblik. Nou pa pou kapab les piblik vir an ron.”

Apre plizoumwenn bann servis i an retar. Annan defwa nou tande dan sa bann deba ki mwan mon'n tande, i dir napa siman, napa lapli, napa delo, bato i an retar. Konmsi en kantite leskiz, ki a lafen dizour ki'n met en pe retar sirtou bann piblik.

Mon konnen ki sa Gouvernman anba *leadership* Wavel Ramkalawan avek son bann Minis ki fek ganny elekte, zot pou bezwen, e zot pou delivre, avek en bon sistenm evalyasyon an plas. E an retour nou pou ganny lenformasyon a atan. E mon krwar sa 7enm Lasanble COGA pou war li avek mwens travay. Mersi bokou.

MR SPEAKER

Mersi Onorab. Onorab Michel Roucou.

HON MICHEL ROUCOU

Mersi Mr Speaker. Bonzour tou Manm Onorab, bonzour tou zabitan Mont Fleuri. Mr Speaker mwan osi parey mon bann lezot koleg, mon pou donn mon sipor sa Komite aköz mon'n war dan lepase in anmenn bokou benefis, pou mon distrik an term bann devlopman dan distrik.

E zis mon lenkyetid en pti pe lo kote en proze ki mon distrik, mon'n war poudir se ki i pa'n benefisyé avek se, sa proze 24/24/24.

Kot la nou'n ganny dir poudir ki se ki i pe ganny fer dan Corgat, ouswa i dan sa redevlopman *Police Quarter* kot pou nou zabitan Mont Fleuri

nou war poudir sa i pa normal. E nou ti ava swete poudir nou osi, e nou konnen ek nouvo Gouvernman la, nou pa konnen ki mannyer sa pou marse, be selman nou ti ava voudre nou osi ki bann zabitan Mont Fleuri i konnen.

Akoz nou annan bokou bann zenn ki pe esper en lakaz zot osi. si nou pou gannyen nou proze 24/24/24, e nou pou kontinyen siport nou redevlopman lakaz Corgate Estate avek Kangard ek bann lezot devlopman ki pe vini.

E lo sa kote Mr Speaker mon osi mon anvi dir se ki nou annan bann lezot proze osi tou, ki sa osi nou pou kontinyen met en lizye lo la, e mon anvi donn mon sipor. Mersi.

MR SPEAKER

Mersi Onorab. Mon a envit Onorab Lemiel pou rezimen.

HON SYLVANNE LEMIEL

Mersi Mr Speaker. M Speaker mon krwar bokou keksoz in ganny dir par tou bann Manm ki'n entervenir. I reste pou mwan dir avek bann Manm, nou lo kote Lopozisyon nou *welcome chairmanship of Government Assurance Committee*. Ler nou zwenn lo Komite, Komite i a deside lekel

ki pou pran *Chairman* lo kote Lopozisyon.

E mwan koman en Manm ki pou form parti sa Komite, mon pou donn mon lasirans pep Seselwa e lasirans nou bann Manm isi dan Lasanble ki nou pe al travay.

Nou pou travay pou fer sir ki Gouvernman i rann kont, ki Gouvernman i dir nou egzaktaman kwa ki pe pase, kwa ki ganny delivre e lo sa ki zot vin delivre isi dan nou Lasanble pou nou fer sir nou fer en swivi e en swivi ki byen.

E mon espere ki antre nou lo sa Komite nou pou kontinyen travay ansanm. Nou kontinyen travay dir pou benefis Sesel e benefis tou lezot dimoun ki'n met nou la dan sa Lasanble. Mersi Mr Speaker.

MR SPEAKER

Mersi Onorab. Avek sa nou'n pare pou pas Mosyon pou vote e mon a zis relir Mosyon;

Sa Lasanble i demande ki en Komite Lasanble Nasyonal anba tit *Committee on Government Assurance* i ganny etabli, e ki son term referans ki deza egziste e ki'n anfors dan 6enm Lasanble Nasyonal i ganny mentenir.”

Tou Manm ki vot pour? Lev lanmen silvouple. Mersi. Komite *on Government*

Assurance in ganny aprouve par Lasanble avek 33 vot pour, 0 vot kont, e 0 abstansyon. Avek sa nou'n ariv a lafen nou *Order Paper* pour ozordi.

Zis 2 pti pwen, mon konnen zot in ganny enformen ki demen zot annan en lazournen sarze, avek en program ki Madanm Clerk in prepare, e sa i komans 10er.

Donk randevou pou zot, 10er. E nou ti osi bezwen prepar *Order Paper* pou semenn prosenn. Alor nou pe propoze ki ABC i *meet* 2er apre midi. Avek sa nou ava *adjourn*.

(ADJOURNMENT)